

46

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 29 1940

3148/0.82

山西通志卷第一百四

山西巡撫都察院右副都御史臣覺羅石麟奉

旨修輯

人物四

太原府

唐

郭震字元振陽曲人大父僑貴鄉震少有大志十六與薛稷

趙彥昭同為太學生家嘗送資錢四十萬會有縷服者叩

門自言五世未葬元振舉與之無少吝亦不質名氏十八

舉進士為通泉尉任俠使氣武后召欲詰既與語奇之索

文章上寶劍篇后覽嘉歎詔示學士李嶠等即授右武衛

鎧曹參軍進奉宸監丞會吐蕃乞和其大將論欽陵謂罷

哈佛大學漢和
圖書館珍藏印

四鎮兵披十姓地乃以元振充使還上疏曰利或生害害亦生利國家所患唯吐蕃與默啜耳令皆和附是將大利於中國也若圖之不審害且隨之欽陵欲裂十姓地解四鎮兵此動靜之機不可輕也若直遏其意恐邊患必甚於前宜以策緩之使其和望勿絕而惡不得萌固當取捨審也夫患在外者十姓四鎮是也患在內者甘涼瓜肅是也關隴屯戍向三十年力用困竭脫甘涼有一日警豈堪廣調發邪善爲國者先料內以敵外不貪外以害內然後安平可保欽陵以四鎮近已畏我侵掠此吐蕃之要然青海吐渾密邇蘭鄯易爲我患亦國家之要今宜報欽陵曰四鎮本扼諸蕃走集以分其力使不得併兵東侵今委之則蕃力益強易以擾動保後無東意當以吐渾諸部青海故

地歸於我則俟斤部落還吐蕃矣此足杜欽陵口而和議未絕且四鎮久附其倚國之心豈與吐蕃等今未知利害情實而分裂之恐傷諸國意非制御之算后從之又言吐蕃倦徭戍久矣咸願解和以欽陵欲裂四鎮專制其國故未歸歟誠能歲發和親使而欽陵常不從則其下必怨設欲大舉固亦不能斯離間之漸也后然其計後數年吐蕃卒誅欽陵而其弟贊婆等來降因詔元振與河源軍大使夫蒙令卿率騎往迎授主客郎中久之突厥吐蕃聯兵寇涼州后方御洛城門宴邊警遽至因輟樂拜元振爲涼州都督卽遣之初州境輪廣纔四百里虜來必傳城下元振始於南硤口置和戎城北磧置白亭軍制束要路遂拓境千五百里自是州無虜憂又遣甘州刺史李漢通關屯田

盡水陸之利稻收豐衍舊涼州粟斛售數千至是疋縑易數十斛支膾十年牛羊被野治涼五歲夷夏畏慕令行禁止道不舉遺河西諸郡置生祠揭碑頌德神龍中遷左驍衛將軍安西大都護西突厥會烏質勒部落盛彊欵塞願和元振卽牙帳與計事會大雨雪元振立不動烏質勒會罷卽死其子娑葛以元振計殺其父謀勒兵襲擊副使解琬勸夜遁元振不聽堅臥營明日素服往弔道逢娑葛兵虜不意元振來遂不敢逼揚言迎衛進至其帳修弔贈禮哭甚哀爲留數十日助喪事娑葛感義更遣使獻馬五千駝二百牛羊十餘萬詔元振爲金山道行軍大總管烏質勒將闕啜忠節與娑葛交怨屢相侵而闕啜兵弱不支元振奏請追入宿衛徙部落置瓜沙間詔許之闕啜遂行至

播仙城經略使周以悌教以重寶賂宰相無入朝請發安西兵導吐蕃以擊娑葛求阿史那獻爲可汗以招十姓請郭虔瓘使拔汗那蒐其鎧馬以助軍闕啜然之卽勒兵擊于闐坎城下之因所獲遣人間道齎黃金分遺宗楚客紀處訥元振上疏曰國家往不與吐蕃十姓四鎮而不擾邊者蓋其諸豪泥婆羅等屬國自有攜貳故贊普南征身殞寇庭國中大亂嫡庶競立將相爭權自相翦屠士畜疲癘財力困窮顧人事天時兩不諧契所以屈志於漢非實忘十姓四鎮也如其有力後且必爭今忠節忽國家大計欲爲吐蕃鄉導主人四鎮危機恐自此啓吐蕃得志忠節亦當在賊掌股若能復得事我哉往吐蕃於國無有恩力猶欲爭十姓四鎮今若効力樹恩則請分于闐疏勒者欲何

以抑之且其國諸蠻及婆羅門方自嫌阻藉令求我助討者亦何以拒之是以古之賢人不願夷狄妄惠非不欲其力懼後求無厭益生中國事也臣愚以爲用吐蕃之力不見其便又請阿史那獻者豈非以可汗子孫能招綏十姓乎且斛瑟羅及懷道與獻父元慶叔僕羅兄佞子俱可汗子孫也往四鎮以他匐十姓之亂請元慶爲可汗卒亦不能招來而元慶沒賊四鎮淪陷忠節亦嘗請以斛瑟羅及懷道爲可汗矣十姓未附而碎葉幾危又吐蕃亦嘗以佞子僕羅并拔布爲可汗矣亦不能得十姓而皆自亡滅此非它其子孫無惠下之才恩義素絕故也豈止不能招懷且復爲四鎮患則用可汗子孫其効固試矣獻又遠於其父兄人心何繇卽附若兵力足取十姓不必要須可汗子

孫也又請以郭虔瓘蒐兵稅馬於拔汗那往虔瓘已嘗與忠節擅入其國臣時在疏勒不聞得一甲一馬而拔汗那國四面無助若履虛邑猶引佞子爲蔽況今北有娑葛知虔瓘之西必引以相援拔汗那倚堅城而抗於內突厥邀伺於外虔瓘等豈能復如往年得安易之幸哉疏奏不省楚客等因建遣攝御史中丞馮嘉賓持節安撫闕啜以御史呂守素處置四鎮以牛師獎爲安西副都護代元振領甘涼兵召吐蕃併力擊娑葛娑葛怒卽發兵出安西撥換焉耆疏勒各五千騎時闕啜在計舒河與嘉賓會娑葛兵奄至擒闕啜殺嘉賓又殺呂守素於僻城牛師獎於火燒城遂陷安西四鎮路絕元振屯疏勒水上未敢動楚客復表周以悌代元振且以阿史那獻爲十姓可汗置軍焉耆

以取娑葛娑葛遺元振書且言無仇於唐而楚客等受關
啜金欲加兵擊滅我故懼死而鬪且請斬楚客元振奏其
狀楚客大怒誣元振有異圖召將罪之元振使子鴻間道
奏乞留定西土以悌乃得罪流白州而赦娑葛睿宗立召
爲太僕卿將行安西酋長務面哭送旌節下玉門關去涼
州猶八百里城中爭具壺漿歡迎都督嗟歎以聞景雲二
年進同中書門下三品遷吏部尚書封館陶縣男先天元
年爲朔方軍大總管築豐安定遠城兵得保頓明年以兵
部尚書復同中書門下三品元宗誅太平公主也睿宗御
承天門諸宰相走伏獨元振總兵扈上事定宿中書十四
日乃休進封代國公實封四百戶賜一子官物千段俄又
兼御史大夫復爲朔方大總管未行會講武驪山旣三令

上親鼓之元振遽奏禮止引坐燾下劉幽求張說扣馬諫
曰元振有大功雖得罪當宥乃流新州開元元年上思舊
功起爲饒州司馬道病卒年五十八十年贈太子少保元
振雖少雄邁及貴居處儉約手不置書人莫見其喜愠建
宅宣陽里未嘗一至諸院廡自朝還對親欣欣退就室儼
如也距國初仕至宰相而親具慶者唯元振云新唐書贊
元振功顯節完一跌未復世恨其蚤歿云

李希靖文水人明經積學言動恒以禮自檢神龍初以進士
拜監察御史正色立朝直言敢諫當時畏其風采雖諸武
擅權希靖不爲屈然性嚴厲不諧於俗故不大顯子愷
王祚太原人魏廣陽侯罔之裔孫也武后時諫罷萬象神宮
知名開元時以大理司直馳傳決獄所至仁平子晃歷左

補闕溫州刺史

王仁皎字鳴鶴太原祁人元宗廢后父也景龍中以將帥舉授甘泉府果毅遷左衛中郎將以后故擢將作大匠進累開府儀同三司封祁國公食戶三百仁皎避職不事委遠名譽卒年六十九贈太尉益州大都督諡昭宣官爲治葬柩行上御望春亭過喪詔張說文其碑上題石子守一與后孿生尙青陽公主從討太平主有功由尙乘奉御遷殿中少監晉國公累進太子少保襲父爵被遇良渥后廢貶柳州別駕至藍田賜死守一財蓄巨萬皆籍入云

李愷并州文水人希靖子愷少秀敏舉明經高第授成安尉母喪免自武功尉以政尤異遷主簿張說在并州引置幕府及執政爲長安尉宇文融括天下田表假監察御史分

道檢覈以課真拜御史坐小累下除晉陽令三遷給事中力於治有任事稱明簿最下無敢給失李林甫意出爲河南少尹尹蕭昺倚權愷裁抑其謬吏下賴之道士孫甌生挾左道干請愷不爲應故挾昺譖諸朝天寶初除清河太守舉美政遷廣陵長史民爲立祠賽祝歲時不絕徙彭城太守封酒泉縣侯連徙襄陽河東竝兼採訪處置使入爲京兆尹楊國忠惡之改光祿卿東京留守封常清募兵東京愷與留臺御史中丞盧奕河南尹達奚珣繕城壘綏勵士卒將遏賊西絳擢禮部尙書祿山薄城下常清兵戰不勝輒北愷收殘士數百裒斷弦折矢堅守人不堪鬪愷約奕吾曹荷國重寄雖力不敵當死官部校皆夜縋去愷坐留守府奕守臺城陷祿山鼓而入殺數千人執愷奕及官

屬蔣清害之贈司徒諡曰忠懿河洛平再贈太尉拜一子
五品官燈通左氏春秋自東都至闕口疇野彌望時謂地
瘠燈十餘子江涵瀕瀛等同遇害唯源彭脫

王海賓太原祁人徙華州鄭爲太子右衛率豐安軍使開元
二年吐蕃寇隴右隴右防禦使薛訥以海賓爲先鋒戰武
階追北自壕口殺寇衆進戰長城堡諸將媚其功按兵顧
望海賓戰死大軍乘之斬賊萬七千級獲馬七萬牛羊四
十萬上憐其忠贈左金吾大將軍

王忠嗣太原祁人海賓子始名訓年九歲而孤授尚輦奉御
入見伏地號泣上撫之曰此去病孤也須壯而將之更賜
今名養禁中使與忠王游及長雄毅寡言有武略論兵應
對蠡起上器之曰後日爾爲良將試守代州別駕數以輕

騎出塞忠王白忠嗣敢鬪恐亡之由是召還信安王禕在
河東蕭嵩出河西數引爲麾下上以其年少有復讎志詔
不得特將嵩入朝忠嗣請精銳數百襲寇會贊普大會閱
武鬱標川其下欲還忠嗣不從提刀略陣斬數千人獲牛
馬萬計嵩上其功上大悅累遷左威衛將軍代北都督封
清源縣男皇甫惟明構之貶東陽府左果毅河西節度使
杜希望欲取吐蕃新羅城薦忠嗣才詔追赴河西進拔其
城功多授左威衛郎將專知兵馬俄吐蕃欲取當新城晨
壓官軍陣衆不敵忠嗣單馬進左右馳突獨殺數百人賊
衆囂相蹂軍彥翼掩之寇大敗拜左金吾衛將軍領河東
節度副使大同軍使尋爲節度使二十九年節度朔方兼
靈州都督天寶元年比討奚奴背戰桑乾河三遇三克耀

武而還進軍磧口經略突厥烏蘇米施可汗請降忠嗣知其詐乃營木刺蘭山謀虛實因上平戎十八策縱反間於拔悉密與葛邏祿回紇三部攻多羅斯城涉昆水斬米施築大同靜邊二城徙清塞橫野軍實之併受降振武爲一城寇不敢盜塞徙河東節度使進封縣公忠嗣本負勇敢及爲將乃能持重嘗曰平世爲將撫衆而已吾不欲竭兵力以幸功名故訓練士馬隨闕繕補有漆弓五十斤每發之軍中士氣盛忠嗣縱詭間隙時出奇兵襲敵所向無不克軍每出雖弓矢亦誌姓名軍還遺弦亡鏃皆按名第罪以是部下人自勸自朔方至雲中袤數千里據要險築城堡斥地甚遠自張仁亶後四十餘年忠嗣繼其功俄爲河西隴右節度使權朔方河東節度佩四將印勁兵重地控

制萬里近世未有也又授一子五品官後數出戰青海積石寇輒奔破又討吐谷渾於墨離平其國乃固讓朔方河東二節度許之時方事石堡城詔問攻取計忠嗣奏吐蕃舉國守之若頓兵堅城下費士數萬然後可圖恐所得不讎所失請待釁取之稍拂旨而李林甫尤忌其功日鉤撫過咎會董延光請下石堡詔分兵應接忠嗣不得已爲出軍而士無賞格河西兵馬使李光弼入說曰大夫愛惜士卒雖名受詔實奪其謀有不如捷歸罪大夫大夫先受禍矣忠嗣曰吾固審得一城不足制敵失之未害於國吾忍以數萬人命易一官哉明日見責不失一金吾羽林將軍歸宿衛否則黔中上佐耳光弼謝曰大夫行古人事光弼又何言延光過期不克果訴忠嗣沮兵又安祿山城雄武

扼飛狐塞請忠嗣助役因欲留其兵忠嗣先期至不見祿山而還數上言祿山且亂林甫益惡之陰使人誣告忠嗣哥舒翰請以官爵贖忠嗣罪上意解貶漢陽太守久之徙漢東郡卒年四十五後翰引兵攻石堡拔之死亡略盡如忠嗣言故當世號爲名將寶應元年追贈兵部尚書唐書贊忠嗣策石堡之得不當所亡高馬直以空虜資論祿山亂有萌可謂深謀然自古忠賢工謀於國則拙於身多矣王縉字夏卿太原祁人居河中少好學與兄維俱以名聞舉草澤文辭清麗科上第歷侍御史武部員外郎擢太原少尹佐李光弼以功加憲部侍郎遷兵部史朝義平詔宣慰河北使還拜黃門侍郎同中書門下平章事進侍中持節都統河南淮西山南東道諸節度行營事辭侍中加東都

留守歲餘拜河南副元帥省軍資錢四十萬縉營完宮室拜盧龍節度使至幽州委軍於朱希彩乃還會辛雲京卒兼領河東節度讓還河南副元帥東都留守太原將王無縱張奉璋恃功以縉儒者易之不如律令縉斬以徇諸將股慄再歲還以本官復知政事時元載專朝縉曲意附離無敢忤又恃才多所狎侮京兆尹黎幹數論執縉折幹曰尹南方孤生安曉朝廷事縉素奉佛不如葷食肉晚節尤謹代宗問浮屠法縉盛陳福業報應五臺山祠鑄銅爲瓦金塗之費億萬計縉給中書符遣浮屠數十輩行州縣斂丐貲貨羣臣承風皆言生死報應故人事置而不修大曆政刑日以湮陵由縉與元載杜鴻漸倡之也及敗同載論死劉晏曰重刑再覆有國常典況大臣乎法有首從不容

俱死上憫其耄貶括州刺史久之遷太子賓客分司東都
建中二年卒年八十二

王端太原人喬萬年第進士有名天寶間與柳芳陸據殷寅
友善據嘗言端之莊芳之辨寅之介可以名世終工部員
外郎

李彭文水人橙子擢明經第天寶中選名臣子可用者自咸
寧丞遷右補闕從入蜀後橙數年卒孫景讓景莊景溫

王翊并州晉陽人翊之兄也性謙柔歷山南東道節度使代
宗目爲純臣世稱謹廉卒贈戶部尚書諡曰忠惠

王翊字宏肱并州晉陽人少治兵家天寶中授翊衛尉羽林
軍宿衛擢才兼文武科出爲辰州刺史與討襄州康楚元
有功加兼秘書少監遷朗州刺史大曆中擢容管經略使

初夷酋梁崇牽號平南都統與別帥覃問合又與西原賊
張俟夏永更誘嘯遂據容州前經略使陳仁琇元結長孫
全緒等皆僑治藤梧翊曰我容州刺史安可客治它所必
得容乃止卽出私財募士有功者許署吏於是人自奮不
數月斬賊帥歐陽珪因至廣州請節度使李勉出兵併力
勉不許翊曰大夫卽不出師願下書州縣陽言以兵爲助
冀藉此聲成萬一功勉許諾翊乃移書義藤二州約皆進
討引兵三千與賊鏖戰日數遇勉檄止之輒匿不發戰愈
力卒破賊擒崇牽悉復容州故地凡百餘戰擒首領七十
覃問遁去復遣將李實等分討西原平鬱林諸州問乘間
來襲翊設伏擊之生擒問嶺表平上遣使慰勞加金紫光
祿大夫賜第京師時吐蕃入寇郭子儀悉河中兵乘邊召

爲河中少尹領節度後務悍將凌正約其徒夜斬關翊覺之陰亂漏刻以差其期衆不敢發俄禽正誅之歷汾州刺史爲振武軍使綏銀等州留後入拜京兆尹會涇原兵叛翊時主供擬挺身走奉天拜太子詹事再遷大理卿出爲福建觀察使徙東都留守開田二十餘屯修器械皆良金壽革練士卒號令精明俄而吳少誠叛獨東畿有備關東賴之貞元十八年卒贈尙書右僕射諡曰肅

溫佶字輔國以字行大雅四世孫安祿山亂往見平原太守顏真卿助爲守計李光弼厚遇之後居鄴薛嵩薦之朝授太常丞一日謝嵩卽去屏處郊野世推其高節

王緯字文卿并州太原人父之咸長安尉與弟之賁之奐皆有文緯舉明經以書判入等歷長安尉大曆中與李泌俱

爲路嗣恭江西觀察判官嗣恭希元載意欲殺泌緯護解僅免泌執政奏於已有私恩德宗許爲報進給事中浙西觀察使缺泌以緯上曰是朕爲君報德者乎黃門要地獨不留議事邪對曰浙西賦入尤劇緯清而忠能惠養民故請遣之制可州縣有韓滉時錢十八萬緡府吏請進奉緯疏蠲以紓民詔聽之貞元十年加御史大夫兼諸道鹽鐵轉運使裴延齡以諸道負錢四百萬緡獻爲羨錢緯奏此諸州經費大忤延齡意改檢校工部尙書卒年七十一贈太子少保緯居官以清白稱然好用刻深吏云

武元衡字伯蒼并州文水人平一孫舉進士累爲華原令移疾去德宗欽其才召拜比部員外郎歲內三遷至右司郎中以詳整任職擢爲御史中丞常對延英上目送之曰是

真宰相器順宗立王叔文使人誘以爲黨拒不納俄爲山陵儀仗使劉禹錫求爲判官不與叔文滋不悅數日改太子右庶子會冊皇太子元衡贊相太子識之憲宗初復拜中丞進戶部侍郎元和二年拜門下侍郎同中書門下平章事兼判戶部事上素知元衡堅正有守故瞻禮信任異它相浙西李錡求入覲旣又稱疾元衡曰錡自請入朝詔旣許之而復不至是可否在錡今天下羣屬耳目若藩臣得遂其私則威令去矣上然之時蜀新定高崇文爲節度不知吏治上難其代詔元衡檢校吏部尙書兼門下侍郎同平章事爲劔南西川節度使繇蕭縣伯封臨淮郡公上御安福門慰遣之元衡至綏靖約束儉已寬民比三年上下完實蠻夷懷歸雅性莊重雖淡於接物而開府極一時

選八年召還秉政李吉甫李絳數爭事不叶元衡獨持正無所違附上稱其長者吉甫卒淮蔡用兵上悉以機政委之王承宗請赦吳元濟使人白事中書悖慢不恭元衡叱去承宗數上章誣詆未幾入朝出靖安里第夜漏未盡賊乘暗呼曰滅燭射元衡中肩復擊其左股徒御格鬪不勝皆駭走遂害元衡批顱骨持去上罷朝坐延英見宰相哀慟爲再不食贈司徒諡曰忠愍詔能得賊者賞錢千萬授五品官積錢東西市以募告者捕得張晏等十八人言爲承宗所遣皆斬之逾月東都執淄青留邸賊門察訾嘉珍自言始謀殺元衡密誅之

武儒衡字延石元衡從弟也姿狀秀偉不妄言與人交終始一節宰相鄭餘慶不事華潔門下客多垢衣敗服獨儒衡

上謁未嘗有所易以莊詞正色見重於餘慶元衡歿帝待之益厚累遷戶部郎中知諫議大夫事俄兼知制誥疏宰相皇甫鏞剝下狀鏞自訴上曰乃欲報怨邪鏞不敢對儒衡論議勁正有風節且將大用宰相令狐楚忌之會草狄兼謨制引武后事盛推仁傑功以沮止之儒衡泣見上曰臣祖平一當天后時避事終老不涉於累上慰勉之繇是薄楚遷中書舍人元稹倚宦官知制誥儒衡鄙厭之會食瓜蠅集其上揮以扇曰適從何處來遽集於此一坐皆失色然以疾惡太分明終不至大任遷兵部侍郎卒年五十六贈工部尚書

劉昌裔字光後太原陽曲人幼重遲不好戲常若有所思度及壯策說楊惠琳順命拜惠琳瀘州刺史署昌裔州佐曲

環表判官爲環檄李納剗曉大誼環上其藁德宗異之從環陳許府遷累進營田副使上官浼代環知後務吳少誠兵薄城浼欲遁昌裔止之曰受詔而守死其職也况士馬完奮若堅壁不戰七日賊氣必衰我以全制之可也浼許諾賊攻堞壞不得修昌裔密造飛棚聯柵卽募突將千人鑿城以出擊賊走之比還柵已立守陴遂安兵馬使安國寧謀應賊以計斬之召其麾下千人爲饗人賞二縑乃伏兵於道令持縑者斬一不能脫賊聞解去以功擢浼陳許節度使昌裔陳州刺史韓全義敗於澉水引軍走陳求入保昌裔登陴揖曰天子命君討蔡何爲來陳且賊不敢至我城下君其舍外無恐改陳許行軍司馬浼卒軍中推昌裔有詔檢校工部尚書代節度命境上吏不得犯蔡人有

來犯者捕得縛送蔡使自治之少誠亦禁境上暴掠封彭城郡公元和八年以檢校尚書左僕射兼左龍武統軍召還卒贈潞州大都督諡曰威

白志貞本名琇珪爲太原吏事節度使李光弼經經自力有智數光弼善之使與帳下議擢累司農卿在官十年德宗以爲敏遂倚腹心進授神策軍使賜今名有所建白言無不從從狩奉天爲行在都知兵馬使抑李懷光不使朝貶恩州司馬稍徙閬州別駕貞元二年起爲果州刺史明年拜浙西觀察使沒於官

王仲舒字弘中并州祁人少客江南與梁肅楊憑游有文稱貞元中賢良方正高第拜左拾遺德宗欲相裴延齡與陽城交章言不可後入閣上顧宰相指曰是豈王仲舒邪俄

改右補闕遷禮部考功員外郎奏議詳雅省中伏其能坐累爲連州司戶參軍再徙荆南節度參謀元和初召爲吏部員外郎尋知制誥楊憑斥無敢過其家仲舒屢存之貶陝州刺史母服除爲婺州刺史州疫旱幾空居五年里閭增完就加金紫服徙蘇州隄松江爲路變屋瓦絕火災賦調與民期不擾自辦穆宗立每言仲舒文宜爲誥有古風召爲中書舍人視同列率新進少年居不樂曰豈可復治筆硯於其間哉宰相聞之除江西觀察使罷酷錢九十萬吏坐失官息錢五十萬焚簿書脫械不問水旱民賦不入歎曰我當減宴樂他用可乎出錢二十萬代之有興浮屠祠屋者驅出境卒於官年六十二贈左散騎常侍諡曰成仲舒尚義槩所居急民廢置自爲科條初若煩密久皆稱

其便

王播字明敷太原人父恕爲揚州倉曹參軍遂僑家焉播貞元中與弟炎起皆有名竝擢進士而播起舉賢良方正異等補盩厔尉以善治獄御史中丞李汶薦爲監察御史劾解雲陽丞源咸季官歷侍御史遇京兆尹李實於衢故事尹當避道揖實不肯播移文詆之實表播爲三原令將折之播受命趨府謝如禮邑中豪彊犯法未嘗輒貸歲終課最實重其才更薦之母喪解還除駕部員外郎長安令于頓奴客與民盜馬吏繫民而縱奴播捕取均其罰遷工部郎中知御史雜事刺舉不阿有能稱言諸鎮不宜閉糴三輔獲濟歷虢州刺史李吳領鹽鐵奏爲副擢御史中丞歲終改京兆尹請禁軍屯列畿內者出入無屬韃佩劔勳戚

家無馳獵近郊盜賊不能隱皆走出境憲宗以爲能進刑部侍郎領諸道鹽鐵轉運使置格律坐隅商處重輕剖決如流吏不能竄其私時討淮西急饋餉引程异自副异尤通萬貨盈虛使馳傳江淮裒財用以給軍興兵得無乏上嘉其功超拜禮部尙書皇甫鎛忌播以异代使播罷守本官久之檢校戶部尙書爲劔南西川節度使穆宗逐鎛長慶初召爲刑部尙書復領鹽鐵進中書侍郎同中書門下平章事以檢校尙書右僕射出爲淮南節度使仍領使職不肯易印詔聽自隨浚七里港以便漕引後賴其利敬宗初拜檢校司空以王涯代使王守澄薦之復領使文宗初就進檢校司徒太和元年入朝拜左僕射復輔政累封太原郡公居位四年卒年七十二贈太尉諡曰敬播少孤貧

自刻苦至成立居官以彊濟稱天性勤吏職每視簿領紛積反用爲樂署吏苟無大罪以歲勞增秩而已卒不易所職雅善占奏雖數十事未嘗書於笏焉

王起字舉之播弟也舉進士入賢良方正異等釋褐校書郎補藍田尉李吉甫辟淮南掌書記以殿中侍御史入兼集賢殿直學士元和末累遷中書舍人數諫畋游歲中考第一錢徽坐貢舉失實貶詔起覆核拜禮部侍郎李宥叛與播俱上疏請詔王智興討之卒定其亂賜金紫拜河南尹進吏部侍郎播居宰相避選曹改兵部爲集賢殿學士拜陝虢觀察使時亳州刺史李繁抵罪起言繁父有功而二千石不宜償賊死不報入拜尙書左丞以戶部尙書判度支奏營田靈武邠寧曠土以省餽輓歷河中節度使歲蝗

旱下令家得儲粟三十斛斥其餘以市否者死神策士怙勢不從寘於法繇是瘡積咸出民賴以生召授兵部尙書以檢校尙書右僕射爲山南東道節度使修復濱漢塘堰與民約爲水令遂無凶年門生李訓爲宰相加銀青光祿大夫復以兵部尙書召判戶部訓敗起素長厚人無異議止罷其判俄加皇太子侍讀文宗好古學當時鄭覃以經術進起以敦博顯上數訪逮時政因積雨願寬逐臣過惡又短鮑叔終身不忘人過以解錮人意俄兼太常卿禮儀使上題詩太子笏以賜詔畫象便殿號當世仲尼其寵遇如此又使廣五位圖開成三年入翰林爲侍講學士改太子少師上知其貧詔月益仙韶院錢三十萬武宗初爲東都留守召爲吏部尙書判太常卿上患選士不得才特命

典貢舉進尚書左僕射封魏郡公凡四舉士皆知名者人伏其鑑擢山南西道節度使同中書門下平章事以夙儒兼宰相秩前世所罕入辭上勞曰宰相無內外公國耆老朕有闕當以聞宴賜備厚宣宗初檢校司空請代不許卒年八十八贈太尉諡曰文懿命使者弔其家葬及祥如之起性友悌播喪哀戚加於人嗜學非寢食不輒廢書無不讀一經目不忘上嘗以疑事質起具榜子附使者上凡成十篇號曰寫宣它撰集亦多

王炎太原人起弟元和中舉進士累歷官曹著有聲績終太常博士

王鏐字昆吾太原人爲湖南團練府裨將楊炎異其才團練使嗣曹王臯使誘降武岡叛將王國良擢邵州刺史臯節

度江西與鏐兵三千使屯潯陽而臯軍襲蘄州遂以衆濟表江州刺史兼御史中丞充都虞候鏐善刺軍中情僞臯推以腹心伊慎攻安州尋使鏐入城中約降翌日城開慎以賊降乃已功不下鏐鏐稱疾避之臯爲荆南節度使復檄都虞候從朝京師臯奏鏐文用雖不足而它可試擢鴻臚少卿先是天寶末西域集京師者數千人隴右陷不得歸仰廩鴻臚禮賓月四萬緡凡四十年鏐悉籍四千人畜馬二千奏皆停給宰相李泌盡以隸左右神策軍以酋長署牙將歲省五十萬緡上嘉其功擢容管經略使凡八年谿落安之遷嶺南節度使召爲刑部尚書以檢校兵部尚書爲淮南杜佑副坐必就司馬聽事不數日遂代佑久之入拜尚書左僕射又檢校司徒爲河中節度使進兼太子

太傅徙河東自范希朝後兵才三萬騎六百府庫殘耗鏐能補完嗇費未幾兵至五萬騎五千財用豐餘會回鶻并麾尼師入朝鏐欲示威武傾駭之乃悉軍迎延列五十里旗幟光鮮戈甲犀利回鶻恐不敢仰視鏐偃然受其禮上嘉之卽除檢校司空同中書門下平章事李絳奏僉望不屬鏐恐天下議以爲宰相可市而取上曰鏐當太原殘破後成雄富之治官爵所以待功功之不圖何以爲勸不聽卒贈太尉諡曰魏鏐善任數持下在淮南常得無名書納鞞中俄取它書焚之異日因小罪并以所告窮驗以示神明子稷歷鴻臚少卿長慶二年爲德州刺史節度使李全略利其貨殺之開成中滄州節度使劉約奏稷子叔泰生五歲爲郡人匿養得不死送至京師詔授九品官使奉鏐

祀

狄兼謨字汝諧仁傑族孫及進士第辟襄陽使府剛正有祖風令狐楚薦授左拾遺數言事歷刑部郎中斬鄧鄭三州刺史歲旱饑發粟賑之改蘇州以治最擢給事中左藏史盜度支縑帛詔勿治兼謨封還詔書曰典吏犯賊不可免上曰朕已赦其長官吏亦宜宥與其失信寧失罪人旣而曰後或事有不可勿以還詔爲憚遷御史中丞上曰卿梁公後當嗣家聲不可不慎兼謨頓首謝江南觀察使吳士矩給軍擅用上供錢數十萬兼謨劾奏臨戎賞士州有定數而士矩與奪由已貽弊一方請付有司治罪士矩遂貶爲蔡州別駕歷兵部侍郎河東節度使還爲尙書左丞命爲益王傅俄領天平節度使以秘書監歸洛陽遷東都留

山西通志 卷一百四
守卒

李光進其先河曲諸部姓阿跌氏隸朔方軍與弟光顏少依舍利葛旃葛旃殺僕固瑒歸河東辛雲京遂俱家太原以沈果稱從馬燧救臨洺戰洹水有功歷前後軍牙門將兼御史大夫代州刺史元和四年范希朝引師救易定表光進爲都將時光顏亦至大夫故軍中呼小大夫俄檢校工部尙書爲振武節度使賜姓以光寵之別詔光顏拜洺州刺史弟兄榮冠當時光進徙靈武卒年六十五贈尙書左僕射有至性居母喪三年不歸寢光顏先娶而母委以家事及光進娶母已亡弟婦籍貲貯納管鑰於姒光進命反之曰婦逮事姑且嘗命主家事不可改因相持泣如初李光顏本河曲部落稽阿跌之族從河東軍爲裨將節度使

馬燧曰若有奇相終必光大解所佩劔贈之討李懷光楊惠琳戰有功從高崇文平劔南數舉旗陷軍出入若神益知名進兼御史大夫歷代洺二州刺史元和元年討蔡以陳州刺史充忠武軍都知兵馬使尋擢節度使詔以其軍當一面光顏乃壁澉水明年陣時曲賊晨壓其營衆不得出光顏毀柵將數騎突入賊中再反往衆識光顏矢集身如蝟子攬馬鞅諫無深入光顏挺劔叱之於是士爭奮賊潰北大破之時諸鎮兵環蔡十餘屯相顧不冑前獨光顏先敗賊始裴度宣慰諸軍還言光顏勇而知義必立功俄又與烏重印破賊小澉河都統韓弘約攻賊賊先薄重印壘重印中矛創甚使請救光顏策賊出則小澉河之堡可乘且重印不可破遣大將田穎宋朝隱襲其城夷之賊失

蓄聚弘怒印違節度將戮穎等舉軍惜其材光顏不敢拒
會中人景忠信知之矯詔械繫馳以聞詔釋之弘及光顏
更上表上謂弘使曰違都統令當死但以功可贖赦之以
爲後圖弘不悅自是與弘有隙十一年屢困賊遂拔凌雲
柵上大悅厚賚其使進檢校尚書左僕射十二年四月敗
賊於郾城死者十三數其甲凡三萬悉畫雷公符斗星署
曰破城北軍郾令董昌齡因勸守將鄧懷金降且來請曰
不戰而屈且赤族請公攻城我舉火求援援至公迎破之
我以城下光顏許之賊已北昌齡懷金開門待光顏入之
城自壞者五十版弘挾賊自重且思撓嶮光顏乃飾名姝
遣使遺之曰以公暴露於外恭進侍者慰征行之勤光顏
約旦日納焉大合將校置酒引使者待姝至秀曼都雅一

軍驚視光顏徐曰我去室家久以爲公憂誠無以報德然
戰士皆棄妻子蹈白刃奈何獨以女色爲樂爲我謝公天
子於光顏恩厚誓不與賊同生指心曰雖死不二因嗚咽
泣下將卒數萬皆感泣因厚遺使還之士氣益勵裴度築
赫連城於洹口率輕騎觀之賊以奇兵自五溝至大呼薄
戰城爲震壞度危甚光顏力戰却之先是光顏策賊必至
密遣田布伏精騎溝下扼其歸賊敗去死溝中者千餘由
是賊悉銳士當光顏而李愬得乘虛入蔡矣董重質棄洹
曲軍降愬光顏躍馬入賊營大呼衆萬餘人投甲請命賊
平加檢校司空入朝召對麟德殿賜與蕃渥及討李師道
徙義成節度使許以忠武兵自隨不三旬再敗賊濮陽拔
斗門斬數千級上言許鄭兵合不可用遂復鎮忠武徙邠

寧軍時鹽州城毀光顏復城之亦以忠武兵從党項引吐蕃圍涇州料兵以赴邠人騰諫光顏爲陳說大義感慨流涕聞者泣下遽卽路寇遁穆宗召還賜開化里第加同中書門下平章事還軍賚貺不貲俄徙鳳翔將伐鎮州復還忠武又兼深冀行營節度使宰相百官班餞上御通化門臨送賜珍器良馬玉帶光顏提軍深入而餽運不至有詔以滄景德棣州益之光顏以宰相處置失宜辭兼領亦會赦成德復所治詔出討李宥朝受命暮卽戎翌日拔尉氏與汴人戰琵琶溝未陣薄之賊走宥平進兼侍中敬宗初真拜司徒河東節度使寶曆二年卒年六十六諡曰忠光顏性忠義善撫士其下樂爲用許師勁悍常爲諸軍鋒故克立勲至禧宗時而猶數藉以破賊焉

王紹太原人端子少爲顏真卿所器字曰德素奏爲武康尉再佐蕭復府包佶領租庸鹽鐵使署判官時徙餉道自潁入汴紹入關德宗已西狩乃督輕貨趣間道走洋州紹先見行在曰佶遣臣貢奉無慮五十萬當卽至上曰道回遠何可望邪後五日繼至遷倉部員外郎時收闕官俸稅茶無名錢以修荒政命紹判務遷戶部郎中皆專領進戶部侍郎判度支頃之遷尙書紹謹密眷待殊厚主計凡八年每政事多所關訪紹亦未嘗一言漏於人順宗立王叔文奪其權拜兵部尙書出爲東都留守元和初檢校尙書右僕射爲武寧軍節度使復以濠泗二州隸其軍蒐輯軍政推誠示人裨將安進達唐重靖謀亂紹以計取之出家貲賞士舉軍安賴復拜兵部尙書判戶部卒年七十二贈右

僕射諡曰敬

王璠字魯玉太原人元和初舉進士宏辭皆中遷累監察御史儀宇峻整著稱於時以起居舍人副鄭覃宣慰鎮州長慶末擢職方郎中知制誥李逢吉特厚之驟拜御史中丞嘗道值左僕射李絳交騎不避絳上言逢吉憚絳正遇其事不奏罷璠爲工部侍郎初璠按武昭獄意逢吉德已及罷中丞乃失望久之出爲河南尹內廐小兒頗擾民殺其尤暴者遠近畏伏入爲尚書右丞再遷京兆尹修舉政事有名宰相宋申錫密與璠議除鄭注璠反以告王守澄而注由是傾心於璠進左丞判太常卿事出爲浙西觀察使李訓薦之復召爲左丞拜戶部尚書判度支封祁縣男訓將誅宦人乃授河東節度使已而敗璠子遐休直弘文館

亦遇害

王正雅字光謙太原人翊子行謹飭崔邠器之元和初擢進士遷累監察御史穆宗時爲萬年令威震豪強尹柳公綽言其能就賜緋魚累擢汝州刺史監軍怙權謝病去入爲大理卿爭宋申錫獄堅甚申錫得不死太和中卒贈左散騎常侍

王涯字廣津太原人晃子博學工屬文梁肅異其才薦於陸贄擢進士又舉宏辭再調藍田尉久之以左拾遺爲翰林學士進起居舍人元和初甥皇甫湜對策忤宰相涯坐不避嫌罷學士再貶虢州司馬徙袁州刺史憲宗思之以兵部員外郎召知制誥再爲翰林學士累遷工部侍郎封清源縣男涯文有雅思永貞元和間訓誥溫麗多所藁定上

以其孤進自樹立數訪逮以私居遠或召不時至詔假光宅里官第諸學士莫敢望俄拜中書侍郎同中書門下平章事罷再遷吏部侍郎穆宗初出爲劔南東川節度使調兵拒吐蕃上言蜀有兩道直擣賊腹一繇龍州清川以抵松州一繇綿州威蕃柵抵棲雞城皆虜險要地臣願不愛金帛使信臣持節與北虜約曰能發兵深入者殺某人取某地受某賞開懷以示之所以要約諄熟異它日者則匈奴之銳可出西戎之力衰矣不報長慶三年入爲御史大夫遷戶部尚書鹽鐵轉運使寶曆時復出爲山南西道節度使文宗初召拜太常卿以吏部尚書總鹽鐵歲中進尚書右僕射代郡公御史中丞宇文鼎奏僕射視事日四品以上官不宜獨拜涯怒卽建言與其廢禮不如審官請避

位以存舊典竟用舊儀建白淄青三道治賦請如建中元年九月戊辰詔書收隸天子鹽鐵詔可久之以本官同中書門下平章事合度支鹽鐵爲一使兼領之奏罷京畿榷酒錢俄檢校司空兼門下侍郎罷度支真拜司空始變茶法益其稅以濟用度命爲榷茶使李訓敗乃及禍涯質狀頗省長上短下動舉詳華性嗇儉不蓄妓妾惡卜祝及它方伎嘗條上衣服室宇制使略如古貴戚皆不便議遂格然年過七十嗜權固位偷合訓等不能潔去就以至覆宗子孟堅爲工部郎中集賢殿學士仲翔太常博士季琰校書郎皆遇禍後令狐楚言露齒不藏深可悼痛上惻然詔京兆尹薛元賞葬涯等十一人各賜襲衣仇士良使竊盜發其塚投骨渭水涯昭宗天復初大赦明涯訓之冤追復

山西通志 卷一百四
爵位官其後裔

烏重印字保君太原人河東將承玘子少爲潞牙將兼左司馬節度使盧從史連王承宗吐突承璀將圖之以告重印乃縛從史帳下士持兵合謹重印叱曰天子有命從者賞違者斬士斂手還部無敢動憲宗嘉其功擢河陽節度使封張掖郡公討淮蔡詔以兵壓賊境割汝州隸其軍與李光顏相犄角大小百餘戰凡三年賊平再遷檢校司空進邠國公徙橫海軍建言河朔能拒朝命者蓋刺史失權鎮將領軍能作威福也使刺史得職大帥雖有祿山思明之奸能據一州爲叛哉臣所管三州輒還刺史職各主其兵因請廢景州法制修立時以爲宜討王廷湊出屯深州時號令乖迕久不敢進穆宗詔杜叔良代之以爲太子太保

長慶末以檢校司徒同中書門下平章事爲山南西道節度使改節天平軍文宗初真拜司徒李同捷授兗海上以重印耆將兼節度滄景以齊州隸軍未幾卒年六十七贈太尉諡懿穆重印善撫士與下同甘苦蔡將李端降蔡人執其妻殺之妻呼曰善事烏僕射得士心大抵如此待官屬有禮當時有名士溫造石洪輩皆在幕府旣歿士二十餘人刳股以祭子漢弘嗣爵母喪奪爲左領軍衛將軍固辭上嘉許之

溫造字簡輿侂子姿表瑰傑性嗜書隱王屋山壽州刺史張建封聞而招禮造欣然曰可人也往從之建封妻以兄子時詔擇縱橫士往說劉濟建封疆署節度參謀使幽州造與濟語未訖濟俯伏流涕曰願率先諸侯效死節造還詔

山西通志 卷一百四
馳驛入奏問造家世及年對曰臣五世祖大雅外五世祖李勣臣犬馬之齒三十有二上奇之將用爲諫官以語泄止復去隱東都烏重印奏置幕府長慶初以京兆司錄爲太原幽鎮宣諭使賜緋衣至范陽劉總繫鞵郊迎造爲開示禍福總矍然籍所部九州入朝還遷殿中侍御史田弘正遇害以起居舍人復宣慰鎮州行營頃之坐與李景儉飲出爲朗州刺史開後鄉渠百里溉田二千頃民獲其利號右史渠召授侍御史知彈奏請復朱衣豸冠示外廡不聽夏州節度使李祐拜大金吾違詔進馬造正衙捫劾祐曰吾夜入蔡州擒吳元濟未嘗心動今日膽落於溫御史遷左司郎中知御史雜事進中丞太和二年內昭德寺火延野狐落御史府官獨不至造自劾曰臺繫賊恐人緣以

構奸申警備乃得入臣請入三十直崔蠡姚合二十直自贖詔奪一月俸造性剛急人或忤已雖貴勢亦以氣出其上道遇左補闕李虞恚不避捕從者笞辱左拾遺舒元褒等言之詔臺官供奉官共道路聽先後行相值則揖中丞傳呼不得過三百步造彈擊無所回畏威望隱然發南曹僞官九十人主史皆論死遷尙書左丞封祁縣子興元軍亂殺李絳衆謂造可夷其亂文宗亦以爲能乃授檢校右散騎常侍山南西道節度使許以便宜從事上慮其勞費造曰臣計諸道戍蠻之兵方還願得密詔受約束用此足矣許之命神策將董重質河中將溫德彝郃陽將劉士和從造而興元將衛志忠張丕李少直自蜀還造喻以意乃用八百人自從五百人爲前軍旣入前軍呵護諸門造欲

山西通志 卷一百四
大宴視聽事曰此隘狹不足饗士更徙牙門坐定將卒羅拜徐曰吾欲聞新軍去住意可悉前舊軍無得進勞問畢就坐酒行從兵合卒有覺者欲引去造傳言叱之乃不敢動卽問軍中殺絳狀志忠丕夾階立拔劍傳呼曰悉殺之圍兵爭奮皆斬首凡八百餘人親殺絳者醢之號令者殊死取百級祭絳三十級祭死事官王景延等餘悉投之漢江監軍楊叔元擁造靴祈哀造以兵衛出之詔流康州以功加檢校禮部尙書賜萬縑賞其兵入爲兵部侍郎出留守東都俄節度河陽奏復懷州古秦渠枋口堰以溉濟河內溫武陟四縣田五千頃召爲御史大夫方倚以相會疾不能朝改禮部尙書卒年七十贈尙書右僕射兄邈弟遜邈累以拾遺補闕召不應遜爲邑宰解印綬去

溫璋造子以蔭累官大理丞陰平吏盜官物而焚帑璋刺得其情擢侍御史賜緋衣遷婺州刺史以政有績賜金紫徙廬宋二州刺史宣州逐鄭薰以爲宣州刺史事旋平就拜觀察使擢武寧節度使銀刀軍驕橫惟璋政嚴明相率逐璋徙邠寧節度歷京兆尹璋素彊幹鉏宿弊豪右惴服加檢校吏部尙書同昌公主薨繫醫親屬三百璋極諫貶振州司馬歎曰生不逢時死烏足惜仰藥死

白居易字樂天太原人北齊五兵尙書建之後也父季庚彭城令說刺史李洧歸朝累擢襄州別駕居易敏悟絕人未冠謁顧況況見其文自失曰吾謂斯文遂絕今復得子矣貞元中擢進士拔萃皆中補校書郎元和元年對制策乙等調整厓尉爲集賢校理月中召入翰林爲學士遷左拾

遺四年早建言乞盡免江淮兩賦以救流瘠且多出宮人
納之李師道上私錢六百萬爲魏徵孫贖故第言徵任宰
相太宗用殿材成其正寢後嗣不能守陛下猶宜以賢者
子孫贖而賜之師道人臣不宜掠美從之河東王鏐將加
平章事言鏐誅求百計不卹彫瘵今若假以名器諸節度
且爭哀割生人以求所欲與之則綱紀大毀不與則有厚
薄時孫璿自禁衛擢鳳翔節度使張奉國定徐州平李錡
遷金吾將軍言宜罷璿進奉國度支囚繫闕鄉獄更三赦
不得原奏請一切免之凡十餘奏益知名吐突承璀率師
出討王承宗言比年以中人爲都監韓全義討淮西賈良
國監之高崇文討蜀劉貞亮監之猶未以中人專統領也
今神策旣不制置行營節度卽承璀爲制將又充諸軍招

討處置使是實都統恐四方聞之必輕朝廷後世且傳中
人爲制自陛下始陛下忍受此名哉且劉濟等洎諸將必
恥受承璀節制此乃資承宗之奸挫諸將之銳不聽旣而
兵老不決又言兵宜罷後對殿中論執強鯁上未諭輒進
曰陛下誤矣上變色罷謂李絳曰是子我自拔擢乃敢爾
必斥之絳曰陛下啓言者路故羣臣敢論得失若黜之是
箝其口也上悟待之如初歲滿當遷請如姜公輔以學士
兼京兆戶曹參軍以便養詔可明年母喪還拜左贊善大
夫盜殺武元衡首上疏請亟捕賊刷朝廷恥以必得爲期
宰相嫌其出位不悅俄有言居易浮華無實行出爲州刺
史中書舍人王涯上言不宜治郡追貶江州司馬順適所
遇若忘形骸者久之徙忠州刺史入爲司門員外郎以主

客郎中知制誥穆宗好畋游獻續虞人箴以諷俄轉中書舍人命持節宣諭田布布遺五百縑詔使受之固辭深州圍益急上言兵多則難用將衆則不一宜詔魏博澤潞定滄四節度令各守境以省度支貲餉每道各出銳兵三千使李光顏將光顏故有鳳翔徐滑河陽陳許軍無慮四萬可徑薄賊開弓高糧路合下博解深州之圍與牛元翼合還裴度招討使使悉太原兵西壓境見利乘隙夾攻之間令招諭以動其心未及誅夷必自生變且光顏久將有威名度爲人忠勇可當一面無若二人者不聽乃改外遷爲杭州刺史始築隄捍錢塘湖鍾洩其水溉田千頃復浚李泌六井民賴之以太子左庶子分司東都復拜蘇州刺史病免文宗立以秘書監召遷刑部侍郎封晉陽縣男太和

初二李黨事興楊虞卿與居易姻家而善李宗閔居易惡緣黨人斥乃移病還東都除太子賓客分司踰年卽拜河南尹復以賓客分司開成初起爲同州刺史不拜改太子少傅進馮翊縣侯會昌初以刑部尚書致仕六年卒年七十五贈尚書右僕射宣宗以詩弔之遺命薄葬母請諡居易被遇憲宗時事無不言多見聽然爲當路所忌遂擯斥乃放意文酒旣復用偃蹇益不合居官輒病去遂無立功名意與弟行簡從祖弟敏中友愛東都所居履道里疏沼種樹構石樓香山鑿八節灘自號醉吟先生爲之傳暮節經月不食葷稱香山居士嘗與胡杲吉叟鄭據劉真盧真張渾狄兼謨盧貞燕集皆高年人慕之繪爲九老圖居易於文章精切最工詩多至數千篇當時士人爭傳雞林行

山西通志 卷一百四
賈售其國相率篇易一金甚僞者相輒能辯之初與元稹
酬詠號元白稹卒又與劉禹錫齊名號劉白其始生七月
能展書姆指之無兩字雖試百數不差九歲暗識聲律其
篤於才華蓋天稟然敏中爲相請諡曰文東都江州皆爲
立祠

李景讓字後已文水人澄孫也性方毅有守寶曆初遷右拾
遺淮南節度使王播以錢十萬求領鹽鐵景讓詣延英亟
論不可遂知名沈傳師觀察江西表以自副歷中書舍人
禮部侍郎商華號三州刺史拜右散騎常侍出爲浙西觀
察使景讓事母鄭孝謹雖老猶被箠敕已起欣欣如初故
所泣有聲家行修治閨門唯謹入爲尚書左丞拜天平節
度使徙山南東道封酒泉縣男大中中進御史大夫甫視

事劾免侍御史孫玉汝監察御史盧侑威肅當朝爲大夫
三月蔣伸輔政見宰相自陳考深當代卽拜西川節度使
以病丐致仕或諫之笑曰兒曹詎餓死乎書聞輒還東都
以太子少保分司卒年七十二贈太子太保諡曰孝景讓
好獎士類嘗推引李蔚楊知退所善蘇滌裴夷直皆被擢
始爲左丞蔣伸坐宴所酌酒語客曰有孝於家忠於國者
飲此客肅然景讓起卒爵伸曰無宜於公性清素寡欲門
無雜賓李琢罷浙西以同里訪之避不見及去命斲其騙
石焉元和後大臣有德望者以居里顯景讓宅東都樂和
里世稱清德號樂和李公云

李景溫字德已景讓弟歷諫議大夫福建觀察使徙華州刺
史以美政聞累遷尚書右丞盧攜當國弟隱遷水部員外

山西通志 卷一百四
郎景溫不許赴省時故事久廢景溫旣舉職人皆躓其正
弟景莊亦至顯官

唐扶字雲翔太原人次子歷屯田郎中太和五年爲山南宣
撫使內鄉倉督鄧琬負度支漕米繫二十八年九人死於
獄扶奏申釋之詔逋繫三年以上者皆原進中書舍人出
爲福州觀察使

唐持字德守太原人次子中進士第太和中爲渭南尉試京
兆府進士尹杜悰欲托親故持輒降階伏悰語塞乃止累
遷工部郎中出爲容州刺史遷給事中歷朔方昭義節度
使卒

王鐸字昭範太原人播弟子會昌初擢進士第累遷右補闕
集賢殿直學士白敏中辟署西川幕府咸通後歷中書舍

人禮部侍郎所取多才實士拜御史中丞以戶部侍郎判
度支十二年繇禮部尙書進同中書門下平章事加門下
侍郎尙書左僕射超拜司徒韋保衡始由鐸得進士時竊
政權鐸持其事不得肆搢紳賴焉鐸亦上疏祈解乃以檢
校左僕射出爲宣武節度使僖宗初以左僕射召始鐸當
國練制度智慮周密時論推允會河南盜起鄭畋數言其
賢復拜門下侍郎平章事乾符六年賊破江陵議統帥鐸
因請自率諸將督羣盜卽以鐸爲侍中荆南節度使諸道
行營都統封晉國公綏納流冗益募軍完器鎧武備張設
舉西平王李晟諸孫係爲將分精兵使守湖南俄而賊捨
廣州鼓而北係望風輒潰鐸退營襄陽於是以高駢代之
貶太子賓客分司東都尋召拜太子少師從入蜀拜司徒

山西通志 卷一百四
門下侍郎平章事加侍中復以太子太保平章事時高駢
數偃蹇每入對必噫嗚流涕固請行時中和二年也乃以
檢校司徒中書令爲義成節度使諸道行營都統判延資
戶部租庸等使鐸表崔安潛自副鄭昌圖裴贄裴樞王搏
等在幕府以周岌王重榮諸葛爽康實安師儒時溥六節
度爲將佐而中尉西門思恭爲監軍率衛兵泊梁蜀師三
萬壁蓋屋移檄天下先是諸將雖環賊莫肯先及鐸檄至
號令殷然士氣皆起爭欲殺賊故巢戰數感宦人田令孜
策賊必破欲使功出已乃構鐸罷爲檢校司徒以義成節
度還屯鐸功已就而讒見奪然卒因其勢困賊後數月復
京師策勲居關東諸鎮第一四年徙義昌節度使過魏樂
彥珍子從訓伏兵高雞泊劫之鐸及家屬吏佐三百餘人

皆遇害弟鐸累官汝州刺史乾符中王仙芝來攻鐸自督
勇士與別將董漢勲守南北門城陷貶韶州司馬終太子
賓客

王龜字大年太原人起子性高簡博知書傳無貴胄氣武宗
雅知之以左拾遺召入謝自陳病詔許終喪召爲右補闕
再擢屯田員外郎稱疾去崔璵觀察宣歙表爲副入爲祠
部郎中史館修撰咸通中知制誥鐸爲相改太常少卿同
州刺史牙將白約素暴橫捕殺之人皆震慄徙浙東觀察
使初式臨州有惠政人聞其至歡迎之卒贈工部尙書子
堯力學有文辭以鐸當國不貢進士終右司員外郎

王式起子以蔭爲太子正字擢賢良方正科累遷殿中侍御
史出爲江陵少尹大中中爲晉州刺史河曲民流徙它州

不納獨式勞卹之活數千人時特峨胡亦飢將入寇汾澮
聞式嚴備不敢道境報其種落曰當避晉州刺史以善最
稱徙安南都護取一年賦市芍木豎周十二里浚壕繚柵
外植刺竹寇不可冒後蠻兵入掠錦田步使譯者開諭一
夕去忠武戍卒號黃頭軍天下銳卒也交趾懼式威譁曰
黃頭軍將渡海襲我矣相率夜圍城請都護北歸我當抗
黃頭軍式徐被甲引家僮乘城責讓矢旡交發叛者走翌
日盡捕斬之初容管災歉不歲貢至式始上輸占城真臘
慕義悉入獻寧國劇賊仇甫亂明越觀察使鄭祇德不能
討宰相選式往代因至京議式奏盜若猖狂天誅不亟決
東南征賦闕矣寧得以億萬計乎兵多則功速費寡二者
孰利上顧左右曰宜與兵詔益許滑淮南兵式發麾幟皆

東靡獵獵有聲喜曰是謂得天時矣聞賊用騎兵乃閱所
部得吐蕃回鶻遷隸數百發龍陂監牧馬起用之集土團
諸兒爲向導擒甫斬之加檢校右散騎常侍餘姚民徐澤
專魚鹽利慈溪民陳城冒名仕至縣令皆豪縱式曰甫竊
發不足畏若澤城乃巨猾也窮治其奸皆榜死咸通三年
檢校工部尚書徙武寧節度使詔許滑兵自隨視事三日
悉以計誅銀刀亂軍罷歸終左金吾大將軍

溫廷皓祁人廷筠弟咸通中署徐州觀察使崔彥曾幕府龐
勛之變以刃脅廷皓使爲表求節度使廷皓給曰表聞天
子當爲公信宿思之勛喜歸與妻子訣明日復見勛索表
倨答曰我豈以筆硯事汝邪其速殺我勛熟視笑曰儒生
有膽邪吾動衆百萬無一人操檄乎囚之更使周重草表

彥曾遇害廷皓亦死贈兵部郎中

王凝字成庶太原人翊曾孫少孤依其舅宰相鄭肅舉明經進士皆中歷臺省寢知名擢累禮部侍郎不阿權近出爲商州刺史驛道所出吏破產不能給而州有冶賦羨銀常摧直以優吏奉凝不取益市馬人無橫擾徙湖南觀察使僖宗召爲兵部侍郎領鹽鐵轉運使坐舉非其人以祕書監分司東都卽拜河南尹乾符四年遷宣歙池觀察使王仙芝黨屠建德凝遣牙將孟琢助守池州賊益兵來攻實欲襲南陵凝遣樊儔以舟師扼青陽儔違令戰不勝斬以徇諸將皆股慄以死綴賊賊不能進復發強弩拒采石張疑幟遣別將馬穎解和州圍明年賊大至都將王涓自永陽赴敵凝宴涓曰賊席勝而驕可持重待之慎毋戰涓不

聽至南陵死焉監軍收餘卒數千還走城卒恣橫凝讓曰今兵不能捍敵又恣之犯民生業何以稱朝廷待將軍意監軍詞屈趣親吏奪民馬凝乘門望見麾左右捕取殺之由是不敢留凝益儲蓄繕完以備賊至不能加會大星墜庭術家言以厭勝凝曰東南國用所出而宣爲大府吾規脫禍可矣一方何賴誓與城相存亡勿復言旣而賊去未幾卒年五十八贈吏部尙書諡曰貞

王重盈祁人重榮兄軍中號毅武歷汾州刺史黃巢度淮擢陝虢觀察使重榮據河中三遷檢校尙書右僕射卽拜節度使尋同中書門下平章事重榮遇害軍中推立重盈留長子珙領陝虢節度使入殺行儒軍復安昭宗立進太傅兼中書令封琅琊郡王父子兄弟相繼帥守而從子蘊亦

歷官忠武節度使乾寧二年卒

王重榮太原祁人父縱太和末爲河中騎將從石雄破回鶻終鹽州刺史重榮以父任爲列校與兄重盈皆以毅武冠軍擢河中牙將主呵察時兩軍士于夜禁捕而鞭之中尉楊元實怒執重榮答曰夜半執者姦盜孰知爪士具言其狀元實更令府擢右署重榮多權詭衆所嚴憚雖主帥莫不下之稍遷行軍司馬黃巢分兵略蒲節度使李都不能支欲降然內憚重榮表以自副重榮脇說都曰我所詭謀紆難以外援未至今賊哀責日急又收吾兵以困我則亡無日矣請絕橋嬰城自守不然變生何以制之都曰願以節假公遂奔行在重榮乃悉驅出賊使斬之上使前京兆尹竇滂間道慰其軍因詔代都重榮遂主留後賊使朱溫

以舟師下馮翊黃鄴自華陰合攻重榮重榮感勵士衆遂大戰敗之賊棄糧仗四十餘艘卽拜檢校工部尙書爲節度使重榮與武功楊復光連和擊賊將李詳於華州執以徇賊使尙讓來攻朱溫將勁兵居前敗重榮兵於西關門遂出兵夏陽掠河中漕米數十艘重榮選兵三萬攻溫溫懼悉鑿舟沈於河遂舉同州降復光欲斬之重榮曰今招賊一切釋罪且溫武銳可用殺之不祥表爲同華節度使有詔卽副河中行營招討賜名全忠巢喪二州怒甚自將精兵數萬壁梁田重榮軍華陰復光軍渭北犄角攻之賊大敗執其將趙璋巢中流矢走重榮兵亦死耗相當懼巢復振與復光計乃遣使約李克用連和克用使陳景斯總兵自嵐石赴河中親率師從之遂平巢復長安以功檢校

太尉同中書門下平章事封琅琊郡王累加檢校太傅中
人田令孜建請二池領屬鹽鐵重榮不聽令孜徙重榮充
海節度使以王處存代之詔克用將兵援河中重榮上書
劾令孜離間方鎮令孜遣邠寧朱玫進討璧沙苑重榮遺
克用書且言奉密詔須公到使我圖公此令孜朱全忠朱
玫之謀也因示偽詔克用遂合河中兵戰沙苑玫大敗俄
有嗣襄王熅之變重榮不受命與克用謀定王室楊復恭
遣諫議大夫劉崇望齎詔諭意克用重榮聽命獻縑十萬
願討玫重榮遂斬熅長安復平重榮嘗辱部將常行儒行
儒怨之光啓三年引兵夜攻府重榮亡出外詰旦遇害
王珂重榮兄重簡子出繼重榮重盈卒軍中推爲留後李克
用薦之許嗣鎮三鎮兵起詔珂會克用以兵趨新平又爲

邠寧糧料使上旣還加檢校司空爲節度使克用以女妻
之珂親迎太原以李嗣昭助守河中朱全忠擊楊行密珂
與太原鎮定等道請加行密都統以討全忠全忠怨之劉
季述之變珂憤見顏色屢陳討賊謀旣反正首獻方物上
甚倚之及李克用兵折全忠乃謂其將張存敬曰珂恃太
原侮慢我爾持一繩縛之存敬襲克絳晉以何緡成之進
攻珂全忠率師繼進卽劾珂交構克用爲方鎮生事不可
赦珂乞師太原爲緡所迨不能進珂急使妻遺克用書曰
賊攻我朝夕見俘乞食大梁矣克用答曰道且斷往救必
俱亡不如歸朝廷珂窮遣使告李茂貞曰上初反正詔藩
鎮無相侵而朱公不顧約以攻敝邑敝邑亡則邠岐非君
所保宜與華州韓公出精銳固潼關以張兵勢茂貞不答

珂益賊會橋毀潛具舟將遁夜諭守兵無有爲用者牙將劉訓言宜行成以緩敵珂然之明日登城語存敬曰君姑退舍須朱公至吾自聽命乃執太原諸將并奉節印內存敬軍豎大幡城上遣兄璘與諸將樊洪見存敬敬解圍而成以兵全忠王出也始事重榮約爲甥舅指日月曰我得志凡王氏者皆事之至是自洛至過重榮墓僞哭而祭次虞鄉珂欲面縛牽羊以見全忠報曰舅之恩無日可忘君若以面縛禮見黃泉其謂我何珂出迎握手泣下駢轡以入居旬日舉珂室徙於汴後令入覲遣人賊之於華州自重榮傳珂凡二十年

張承業字繼元唐僖宗時宦者也本姓康幼爲內常侍張泰養子晉兵擊王行瑜承業數往來兵間晉王喜其爲人及

昭宗爲李茂貞所迫奔太原先遣承業使晉以道意因以爲河東監軍其後崔印誅宦者晉王憐承業不忍殺匿之斛律寺昭宗崩乃出承業復爲監軍晉王病且革以莊宗屬承業曰以亞子累公等莊宗常兄事承業歲時升堂拜母甚親重之莊宗在魏與梁戰河上十餘年軍國之事皆委承業承業亦盡心不懈凡所以畜積金帛收市兵馬勸課農桑而成莊宗之業者承業之功爲多自貞簡太后韓德妃伊淑妃及諸公子在晉陽者一切以法繩之權貴皆斂手畏承業莊宗歲時自魏歸省親須錢蒲博賞賜伶人而承業主藏錢不可得莊宗乃置酒庫中酒酣使子繼岌爲承業起舞罷承業出寶帶幣馬爲贈莊宗指錢積曰和哥乏錢可與錢一積何用帶馬爲也承業謝曰國家錢非

臣所得私也莊宗以語侵之承業怒曰臣老勅使非爲子孫計惜此庫錢佐王成霸業爾若欲用之何必問臣財盡兵散豈獨臣受禍也莊宗顧元行欽曰取劔來承業起持莊宗衣而泣曰臣受先王顧托之命誓雪國家之讎今日爲王惜庫物而死死不愧於先王矣閻寶從旁解承業手令去承業奮拳毆寶踣罵曰閻寶朱溫之賊蒙晉厚恩不能有一言之忠反諂諛自容邪太后聞之使召莊宗莊宗酌兩卮謝承業承業不肖飲太后使人謝承業曰小兒忤公已笞之矣明日與莊宗俱過承業第慰勞之盧質嗜酒傲忽多侮慢莊宗深嫉之承業乘間請曰盧質嗜酒無禮臣請爲王殺之莊宗曰吾方招納賢才以就功業公何言之過也承業起賀曰王能如此天下不足平也質因此獲

免天祐十八年莊宗已諾諸將卽位承業方臥病聞之自太原肩輿至魏諫曰大王父子與梁血戰三十年本欲雪國家之讎而復唐之社稷今元兇未滅遽以尊名自居非王父子之初心且失天下望不可莊宗謝曰此諸將之所欲也承業曰不然梁唐晉之仇賊而天下所共惡也今王誠能爲天下去大惡復列聖之深讎然後求唐後而立之使唐之子孫在孰敢當之使唐無子孫天下之士誰可與王爭者臣唐家一老奴耳誠願見大王之成功然後退身田里使百官送出洛東門而令路人指而歎曰此本朝敕使先王時監軍也豈不臣主俱榮哉莊宗不聽承業知不可諫乃仰天大哭曰吾王自取之悞老奴矣肩輿歸太原不食而卒年七十七同光元年贈左武衛上將軍謚正憲

山西通志 卷一百四
郝忠榆次人舊志稱其文可經國武可濟時珪璋之器無玷
無瑕敵愾之心有謀有勇官至明經宿衛昭武校尉上柱
國

索自通清源人字德之爲方鎮有戰功

山西通志卷第一百四

山西通志卷第一百五

山西巡撫都察院右副都御史臣覺羅石麟奉

旨修輯

人物五

太原府

五代

張源德晉人從李罕之入梁自金吾衛將軍爲蔡州刺史梁
貞明三年分魏相等六州爲兩鎮遣劉鄩將兵萬人屯於
衛以虞變魏軍迫節度使賀德倫以魏博降晉時源德爲
鄩守貝州晉王入衛先襲破德州乃以兵五千攻貝源德
堅守不下晉軍塹而圍之已而劉鄩大敗於故元城南走
黎陽晉軍攻破洺州而衛邢磁相滄或降或棄城走當此

時晉已先下全燕而鎮定皆附於晉自河以北山以東四面千里六鎮數十州之地皆歸晉獨貝一州圍之踰年不可下源德守既堅而貝人聞晉已盡有河北城中食且盡乃勸源德出降源德不從遂見殺

張丕陽曲人尚氣節後唐武皇鎮太原用度多選富家子主帑庫或調度不給卽坐誅没入貲產丕爲之滿歲府財有餘宗人政當補其任率族屬泣拜請丕濟其急丕又爲代掌一年鄉里服其義孫頴晉安州防禦使

李嗣昭本姓韓氏汾州大谷縣民家子太祖出獵至其家見林中鬱鬱有氣召其父問焉父言家適生兒太祖因遺以金帛而命弟克柔養爲子初名進通後更名嗣昭嗣昭短小而膽勇過人初嗜酒太祖嘗微戒之遂終身不飲太祖

愛其謹厚常從用兵爲內衙指揮使王琪與兄珂爭立遣嗣昭助珂敗琪於猗氏獲其將三人梁軍救琪又敗之於胡壁堡執其將一人光化元年梁遣丁會應李罕之嗣昭與戰含山執其將一人斬首三千級遂取澤州二年晉遣李君慶攻梁潞州君慶敗嗣昭攻克之三年取梁洺州天復元年梁圍太原嗣昭日以精騎出擊梁兵會大雨梁軍解去復取汾州斬叛將李瑋遂出陰地取慈州降其刺史唐禮又取隰州降其刺史張瓌是歲梁軍圍鳳翔嗣昭乘間攻梁晉絳戰平陽執梁將一人進攻蒲縣梁朱友寧氏叔琮以兵十萬迎擊之嗣昭走梁軍圍太原太祖謀走雲州李存信等勸奔契丹嗣昭力爭以爲不可乃止嗣昭晝夜出奇兵擊梁軍梁軍解去嗣昭復取汾慈隰是時鎮定

皆絕晉而附梁晉外失大國之援內亡諸州浹歲間孤城被圍者再於此時嗣昭力戰之功爲多天祐三年與周德威攻梁潞州降丁會爲昭義軍節度使梁遣李思安將兵十萬攻潞築夾城以圍之梁太祖嘗遣人招降嗣昭斬其使者閉城拒守踰年莊宗始攻破夾城嗣昭完輯兵民撫養甚有恩意梁晉戰胡柳周德威戰死莊宗欲還臨濮嗣昭曰梁軍已勝旦暮思歸吾若收軍使彼休息整而復出何以當之宜以精騎撓之因其勞乏可以勝也莊宗然之是時梁軍已登無石山嗣昭轉擊山北而莊宗以銀槍軍趨而呼曰今日之戰得山者勝晉軍爭登山梁軍遽下陣於山西晉軍從上急擊大敗之權知幽州居數月代去幽州人皆號哭閉關遮留之夜遁乃得去十九年從莊宗擊

契丹於望都契丹圍數十重嗣昭以三百騎決圍取莊宗以出是時閻寶敗於鎮人代爲招討鎮兵出掠九門以奇兵擊之鎮軍且盡餘三人匿破垣中嗣昭馳馬射之反爲賊射中腦顧箠中矢盡拔矢於腦射殺一人還營而卒嗣昭諸子繼儔長而懦弟繼韜自立爲昭義軍留後遣其弟繼遠入梁梁拜繼韜同中書門下平章事居數月梁滅會赦至因隨其母楊氏朝於京師以賂獲釋後令繼遠起變於軍中事泄斬竝斬繼遠以繼儔知潞州事其弟繼達殺繼儔節度副使李繼珂募市人千餘攻繼達繼達走城外自剄死嗣昭七子繼能繼襲皆見殺惟一子繼忠僅免晉高祖立以爲忻棣單三州刺史開運中卒先是楊氏積貲贏百萬嗣昭父子三人賴之

王權字秀山太原人唐左僕射起之曾孫父蕘官至右司郎中權舉進士爲右補闕唐亡事梁爲職方員外郎知制誥翰林學士累遷御史中丞唐莊宗滅梁貶隨州司馬起爲右庶子累遷戶部尚書晉高祖時爲兵部尚書當奉使於遼辭不行坐是停任踰年以太子少傅致仕卒年七十八贈左僕射

張憲字允中晉陽人沉靜寡慾少好學能鼓琴飲酒莊宗素知其文辭以爲天雄軍節度使掌書記及卽位拜工部侍郎租庸使遷刑部侍郎判吏部銓東都副留守憲精於吏事甚有能政莊宗幸東都命治卽位壇爲鞠場憲言卽位壇王者所以興也漢鄗南魏繁陽壇至今皆在不可毀莊宗卒毀之又問憲庫錢幾何憲上庫簿有錢三萬緡莊宗

謂以故紙給我益怒之郭崇韜伐蜀薦憲可任爲相而宦官伶人不欲憲在朝廷樞密承旨段徊曰憲材誠可用不如任以一方乃以爲太原尹北京留守趙在禮作亂憲家在魏州在禮善待其家遣人以書招憲憲斬使不發書而上之明宗入京師永王存霸奔太原左右請拘之憲曰吾本書生無尺寸之功而人主遇我甚厚豈宜懷二心以幸變第可與之俱死爾從事張昭遠教憲奉表勸進憲涕泣拒之已而北京巡檢符彥超麾下兵大譟殺存霸憲出奔忻州亦見殺

五代史傳論予於舊史考憲事實而永王存霸符彥超與憲傳所書始末皆不同要其大節亦可以見也憲之志誠可謂忠矣當其不顧其家絕在禮而斬其使涕泣

山西通志 卷一百五
以拒昭遠之說其志甚明至其欲與存霸俱死及存霸被殺反棄太原而出奔然猶不知其心果欲何爲也而舊史書憲坐棄城而賜死予以爲不然予之於憲固欲成其美志而要以憲失其官守而其死不明故不得列於死節也

安永信交城人知勇過衆文武兼資爲唐節度使諡忠簡贈太師

相里金字奉金并州人也勇悍而折節下士爲五院軍隊長戰柏鄉胡柳皆有功遷黃甲指揮使同光中拜忻州刺史時諸州皆以部曲主場務漁蠹公私金獨禁部曲不與事遷隴州防禦使廢帝起兵鳳翔首遣判官薛文遇往來計事廢帝初拜保義軍節度使晉高祖起兵爲太原四面步

軍指揮使晉初徙鎮建雄罷爲上將軍天福五年卒贈太師

李筠太原人善騎射初隸後唐秦王從榮麾下從從榮至天津橋射殺十數人已而遁去清泰初應募爲內殿直遷控鶴指揮使晉開運末趙延壽召寘帳下及延壽被執遼將耶律解里統二千騎留鎮州筠與諸將謀伺間擊之控鶴左廂都校白再榮持兩端匿室中筠拔佩刀破幕引臂逼再榮行殺傷相當解里棄城去漢高祖立授博州刺史周太祖鎮大名表爲先鋒指揮使又爲北面緣邊巡檢泊起兵入汴從敗慕容彥超於留子陂有功周太祖立遷昭義軍節度使檢校太傅同平章事累以奇兵擊敗遼援北漢兵加兼侍中周恭帝立進太尉宋太祖立遣使加兼中書

令諭以入朝筠卽欲拒命不得已下拜及延使者升階置酒張樂遽索周太祖畫像懸壁涕泣迸諸賓佐告宋使曰令公被酒失其常性幸勿爲訝未幾遣牙將劉繼冲等稱臣於北漢主劉承鈞宋太祖遣其子皇城使守節諭旨筠謀益急遂起兵從事閻邱仲卿曰大梁兵甲精銳難與爭鋒我孤軍舉事其勢甚危倚援河東終未得力不如西下太行直抵懷孟塞虎牢據洛邑東向爭天下計之上也筠曰吾周朝宿將禁衛皆舊人必倒戈歸我况有儋珪槍撥汗馬何憂天下哉儋珪筠愛將有勇力善用槍撥汗筠駿馬日馳七百里故筠誇焉頃之使人殺澤州刺史張福據其城承鈞率兵來援筠上謁於太平驛見兵衛寡弱內甚悔承鈞封筠西平王筠自陳受郭氏大恩不敢愛死而周

與漢爲世讐承鈞心疑之命宣徽使盧贇監其軍筠益怏怏留子守節守上黨自引衆南向宋遣石守信等討之敕曰勿縱筠下太行急進師扼其隘破之必矣太祖遂親征與守信會破筠衆於澤州南殺盧贇筠走還保澤州太祖親督戰拔其城筠赴火死隨進兵潞州守節降除單州團練使筠事母孝每怒將殺人母屏風後呼曰可爲吾曹增福遽舍之筠有愛妾劉氏欲俱死筠以其有娠麾令去聶文進并州人善書筭給事漢高祖帳中高祖鎮太原以爲押司官高祖卽位歷拜領軍屯衛將軍樞密院承旨遷右領軍大將軍及謀殺楊邠等文進夜作詔書制置中外邠等已死文進點閱兵籍指揮殺戮以爲己任周兵至京師太后使謂文進善衛帝對曰臣在此百郭威何害旋見殺

鄭仁誨字日新太原晉陽人初事唐將陳紹光紹光嘗因醉怒仁誨拔劍欲殺之左右皆奔走仁誨植立不動無懼色紹光擲劍於地曰汝有器量必富貴非吾所及也仁誨後還鄉里事母以孝聞周太祖居河東帳下時時往過仁誨與語甚懽每事有疑卽從質問仁誨所對不阿周太祖益奇之漢興薦爲內客省使攻李守貞於河中軍中機畫多所參決太祖入立爲大內都點檢恩州團練使樞密副使累遷宣徽北院使出爲鎮寧軍節度使顯德元年拜樞密使世宗攻河東仁誨留守東都明年冬疾卒仁誨自其微時常爲太祖謀畫及居大位太祖世宗皆親重之性謙謹好禮不自矜伐爲士大夫所稱贈中書令追封韓國公諡忠正

李重進太原人周太祖甥生於太原累官歸德軍節度使宋太祖受禪加重進中書令治城繕兵以拒城陷舉族自焚死

韓通并州太原人以勇力聞補騎軍隊長漢祖寘帳下累遷軍校轉衙隊副指揮使從討杜重威得銀青階檢校國子祭酒漢初加檢校左僕射隱帝遷奉國指揮使乾佑初周祖伐河中知通謹厚命自隨先登身被六創遷都虞侯爲天雄軍馬步軍都校周祖委以心腹及入汴甚有力焉授奉國左第六軍都校領雷州刺史廣順初轉虎捷右廂遷左廂克孟州巡檢繼領永睦二州防禦使親征兗州爲在京右廂都巡檢時河盜灌河陰城命率廣銳卒千二百浚汴口又部築河陰城剗營壁尋拜保義軍節度觀察留後

正授節度命副河中王彥超出晉州道擊劉崇爲太原北面行營部署穴地道攻其城俄班師移鎮曹州檢校太保世宗以深冀間有胡蘆河東西橫亘數百里堤場非峻不能扼遼師奔突顯德二年命浚治之功未就遼師至通迎擊退之遂城李晏口爲靜安軍四旬而訖又城東鹿鼓城葺祁州收瘞遺骸爲萬人冢又城博野安平領百餘騎督役會遼騎數百奄至通率麾下與戰日暮大風雨遼人解去又城百八橋鎮武強縣胥旬日訖攻秦鳳爲西面行營馬步軍都虞侯入大散關圍鳳州分兵城固鎮以斷蜀餉道遂拔鳳州授侍衛馬步軍都虞侯征淮南命爲京城都巡檢時築新城又廣舊城街道通領其役會幸淮上留爲在京內外都巡檢權點檢侍衛司才半歲而城工訖三年

改節忠武檢校太傅又改侍衛馬步軍都虞侯幸壽春復爲京城內外都巡檢改節歸德六年春詔按行河堤因發徐宿宋單等州民浚汴渠數百里北征命先赴滄州賜襲衣金帶鞍馬器帛卽領兵入遼乾寧軍南俄爲陸路都部署又命巡北邊自浮陽至淤口浦壞坊三十六遂通瀛莫初克益津關以爲霸州役濱棣民數千城之命董其役師還以檢校太尉同平章事充侍衛親軍馬步軍副都指揮使恭帝移領鄆州陳橋之役通在殿閣聞有變惶遽而歸軍校王彥昇遇於路策馬逐之通馳入其第未及闔門爲彥昇所害妻子皆死太祖詔贈中書令以禮收葬遣高品梁令珍護喪事通性剛而寡謀號韓瞪眼其子有智略號橐駝兒常勸通早爲之所通不聽後太祖見通及其子畫

像於開寶寺壁遽命去之

趙廷隱并州太原人隨孟知祥入蜀拳勇有智略知祥麾下無及者東川董璋襲成都廷隱大破之璋奔歸爲部下所殺知祥遂有其地及僭號令總親軍爲衛聖諸軍馬步軍指揮使累遷至太師中書令宋王卒諡忠武

趙崇韜廷隱子驍果有父風爲都知領殿直四番後累遷至客省使周世宗克秦鳳將入蜀境爲崇韜拒退歷左右衛聖步軍都指揮使選其子文亮尚主加領洋州武定軍節度山南武定緣邊諸砦都指揮副使漢源之戰獨策馬先登及軍敗猶手擊殺十數人爲宋師所擒

高彥儔并州太原人父暉宣威軍使彥儔從知祥入蜀累歷軍校爲昭武軍監押景嗣位遷邛州刺史改馬步軍使漢

兵入大散關克安都砦彥儔以所部先進漢人燒砦毀閣遁盡銳追之復其砦而還尋領趙州刺史爲奉鑾肅衛都指揮副使改右驍銳馬軍都指揮使加光聖馬軍都指揮使真拜源州武定軍節度周顯德初向訓攻鳳州彥儔出兵未至聞唐倉敗潰歸判官趙玘以城歸周彥儔遁歸成都景不之罪爲右奉鑾肅衛都指揮使改功德使廣政二十二年授夔州寧江軍都巡檢制置招討使加宣徽北院事利州昭武軍節度宋師至謂副使趙崇濟監軍武守謙曰北軍涉遠而來利在速戰不如堅壁以待之守謙不從獨領麾下出戰豬頭鋪敗走彥儔以所部將出拒戰宋師已乘城而入判官羅濟勸單騎歸成都彥儔曰我昔已失天水今復不能守夔州縱不忍殺我亦何面目見蜀人哉

濟又勸降彥儔曰老幼百口在成都若一身偷生舉族何
負吾今日止有死耳卽解符印授濟具衣冠望西北再拜
登樓縱火自焚後數日劉廷讓得其骨煨燼中以禮收葬
初景母語景惟彥儔可任及是果能死難

王淡唐相溥之子入閩依王審知仕宦

宋

藥元福并州晉陽人幼有膽氣善騎射初事邢帥王檀爲廳
頭軍使事後唐爲拱衛威和親從馬鬪軍都校天平軍內
外馬軍都指揮使晉天福中爲深州刺史開運初駕駐澶
淵契丹陣城北元福以左千牛衛將軍領兵居陣東偏澶
民馬破龍告契丹曰先攻其東即浮梁可奪契丹盡銳來
戰元福領二百騎躍出而鬪奮鐵搥擊契丹斃者數人左

右馳突無不披靡契丹兵潰上登城望見召撫之曰汝奮
不顧命雖古忠烈無以過擇名馬賜之明日將戰面授鄭
州刺史爲權臣所沮止刺原州俄改秦州明年與李守貞
符彥卿皇甫遇張彥澤等禦契丹於陽城爲右廂副排陣
使士馬饑渴契丹順風揚塵諸將欲俟風反戰元福曰軍
中饑渴已甚若俟風反出戰吾屬爲虜矣彼謂我不能逆
風以戰宜出其不意以擊之此兵家之奇也乃率麾下騎
開拒馬出戰諸將旣至契丹大敗追北二十餘里殺獲甚
衆擢爲威州刺史會靈武三族酋長拓跋彥超石存也廝
褒攻靈州節度王令溫詔馮暉鎮朔方率關右兵進討以
元福將行營騎兵元福與暉出威州土橋西遇彥超兵七
千餘邀暉行李元福轉戰五十里殺千級擒三千餘人又

遣部校援出令溫朔方距威州七百里無水草號旱海師
須齎糧以行至耀德食盡比明行四十里彥超等衆數萬
布爲三陣扼要路據水泉以待暉遣人賂之求和解往復
數四至日中列陣如故元福曰彼知我軍饑渴邀我於險
旣許和解而日中未決此豈可信哉欲困我耳遷延至暮
則吾黨成擒矣暉驚曰柰何元福曰彼雖衆而精兵絕少
依西山爲陣者是也餘不足患元福請以麾下騎先擊西
山兵公但嚴陣不動俟敵少却當舉黃旗爲號旗舉則合
勢進擊敗之必矣暉然其策遂率衆進擊敵衆果潰元福
卽舉黃旗以招暉暉軍繼進彥超大敗橫尸蔽野是夕入
清邊軍明日至靈州元福還郡詔賜衣帶繒帛銀器漢乾
祐中從趙暉討王景崇於鳳翔蜀兵數萬來援都監李彥

從軍却元福領數百騎自後驅之下令還顧者斬衆皆殊
死戰大敗蜀兵追至大散關殺二千餘人餘皆棄甲遁去
鳳翔平以功遷淄州刺史周廣順初爲徐州行營兵馬都
監平楊溫改陳州防禦使未幾王峻拒劉崇於晉州以元
福爲西北面都排陣使軍過蒙坑與仇超陳思讓追至霍
邑峻止之元福曰宜追奔深入以挫其勢諸將畏懦遂止
周祖後調兵戍晉州曰去年若從藥元福言則無邊患矣
俄爲兗州行營馬步軍都虞侯討慕容彥超詔自晉州率
所部入朝卽遣東行賜六銖袍帶鞍馬器仗曰比用曹州
防禦使鄭璋我度彥超凶狡多計謀恐璋不能集事選爾
代之已敕曹英向訓不令以軍禮見汝及至軍中英訓皆
尊禮之推爲宿將遂築連城圍兗彥超晝夜出兵屢擊敗

之閉壁不敢出十餘日元福營柵皆就又穴地及築土山百道攻其城會周祖親征元福以所部先入羊馬城諸軍鼓譟角進拔之以功授建雄軍節度世宗圍太原城以元福爲同州節度充太原四面濠砦都部署時攻具悉備城中危急以糧運不繼班師元福上言曰進軍甚易退軍甚難世宗曰一以委卿遂部分卒伍爲方陣而南元福以麾下爲後殿崇果出兵來追擊走之師還加檢校太尉移鎮陝州又歷定廬曹三鎮宋初加檢校太師九月卒年七十七贈侍中元福雖老筋骨不衰人或言其氣貌益壯當復領兵必大喜時稱驍將

薛懷讓其先戎人徙居太原少勇敢隸晉王帳下累歷軍職明宗時改神武右廂都校領獎州刺史東川董璋遣率軍

從晉祖討賊賊平遷絳州刺史清泰初移申州晉天福中爲鄴都招收使及戰中流矢詔賜湯藥存問又歷沂遼密懷四州詔至闕賜襲衣玉帶爲青州行營先鋒都指揮使以功改宿州團練使幸澶州遣與李守貞皇甫遇梁漢璋率兵萬人緣河而下以守汶陽又命爲洛州團練使會符彥卿北征爲馬軍左廂排陣使又從北面都招討杜重威爲先鋒都指揮使及中渡橋降非其志也麻答守鎮州遣步健督洛州供運懷讓聞漢祖舉義卽殺步健奉表歸漢漢祖遣郭從義分兵萬餘與懷讓取邢州契丹帥劉鐸堅壁拒不克而還麻答遣副將楊安以八百騎攻懷讓又命剛鐵將三百騎繼之懷讓戰不勝退保州契丹大掠及鎮軍逐麻答楊安遁鐸又納款懷讓乘其不虞遣人給鐸請

置頓鐸開門迎之懷讓殺鐸奪其城卽授安國軍節度乾祐初移鎮同州及殺楊邠等急召至闕遂降周祖周初賜襲衣金帶鞍勒馬遣還任加同平章事劉崇入表求西征詔褒之受夏陽富人張廷徽賂寃趙隱等五人爲盜殺之俄獲賊有司請逮懷讓以宿將釋不問俄爲左屯衛上將軍世宗加左武衛顯德五年拜太子太師致仕恭帝封杞國公宋建隆元年卒年六十九贈侍中懷讓好畜馳馬有大鳥小鳥尤奇駿漢隱帝使求之不獻及罷節鎮猶有馬百匹橐駝三十頭朝夕閱視爲娛云

侯章并州榆次人事後唐莊宗爲隊長明宗朝遷小校晉開運末爲忠衛指揮使屯陝州爲內外馬步軍都指揮使兼三城巡檢使與趙暉王晏謀斬遼將劉愿送欵於漢祖擢

鎮國軍節度乾祐初加同平章事尋移鎮邠州因見戶爲逃擅其租賦乃矯奏貧民數千戶負稅租願以已俸代詔褒之求副使趙彥鐸良馬不得誣殺之俄加檢校太師周初加兼侍中廣順二年入朝請開宴周祖謂左右曰諸侯來朝自當錫宴以申愷樂豈俟其貢奉爲之耶命復賜之仍令有司自今藩鎮有進奉者勿受俄賜宴廣政殿上壽復不納三年授鄧州節度封申國公世宗初加兼中書令征壽陽命爲攻城水砦都部署俄徙西北水砦再爲武勝軍節度宋建隆元年八月授太子太師封楚國公旣罷節鎮時有輕章者章厲聲曰當遼主謀歸有上書請避嵩山者我虜人以戰鬪取富貴若此諛佞未嘗爲之坐中有慚者乾德五年卒

邊光範字子儀并州陽曲人性謙退和雅有吏才父仁嗣忠武軍節度副使光範後唐天成二年起家榆次令召爲殿中丞賜緋長興四年改太常丞晉天福初服闋授校檢戶部員外郎北京留守判官兼侍御史二年拜太府少卿上書曰臣聞唐太宗有言朕居深宮之中視聽不能及遠所委者都督刺史則知此官實繫治亂必須得人今則刺史或因緣世祿或貢奉家財或微立軍功或但循官序實恐撫民無術御吏無方以此牧民而民受其賜鮮矣望選能吏以蘇民瘼用致升平奏留中俄爲冊秦王李從暉副使張從恩奏授河南判官遷秘書監兼御史中丞入拜大理少卿改衛尉充開封府判官又改光祿廣晉府判官賜金紫出帝初拜右諫議大夫權知開封府事遷給事中使毫

州括借軍糧稱平允出使遼修好至趙州召還開運元年權知鄭州拜左散騎常侍二年入爲樞密直學士上以藩邸舊僚待遇尤厚因遊宴見位翰林學士下卽日拜尚書禮部侍郎知制誥充翰林學士仍直樞密院漢初改檢校刑部尚書衛尉卿上言伏見朝廷除刺史不限年月或未及期年又聞除代往來跋涉豈暇撫懷望慎選良牧立定年限以責輯綏之効不報乾祐二年使虞城襄城按民田爲吳越加恩使廣順初出知陳州遷秘書監俄召拜御史中丞賜襲衣銀器繒綵鞍勒馬復爲禮部侍郎將及秋試言於執政曰他曹公事光範不敢辭若處文衡校閱名賢品藻優劣非下走所能及期辭疾不出時論多其自知世宗初改刑部侍郎權知開封府俄遷戶部顯德三年檢太

名民田五年普均租稅光範詣宋州韓通言其均平世宗嘉之宋初征澤潞命爲前轉運計度鄭洛汝孟懷芻糧拜太常卿以吏部尚書張昭耆老令簽判選事建隆四年權知襄州路當衝會餉饋無闕召還復知襄州供億討蜀軍人不知勞坐舉李楫左遷太子賓客仍知襄州五年兼橋道使計工以州卒代民官給器用役不淹久人以無擾詔褒美開寶四年復判吏部銓曹尋判御史臺事數月真拜中丞六年以疾解銓任卒年七十三光範性孝嘗吮母疽景德中錄孫易從同學究出身

郭從義其先沙陀人父紹古事後唐武皇忠謹特見信任賜姓李氏紹古卒從義纔卅角莊宗畜於宮中明宗與紹古歛狎卽位以從義補內職累遷內園使晉天福初復姓郭

氏坐事出爲宿州團練副使內艱歸遂家太原漢祖表爲馬步軍都虞侯累破契丹於代北及建大號從義首贊其謀擢鄭州防禦使充東南道行營都虞侯領首軍自太行路渡河爲河北都巡檢使討杜重威爲行營軍都虞侯重威降爲鎮寧軍節度討趙思綰爲行營都部署賜戎裝器仗金帶師至永興圍其城卽以爲永興軍節度思綰糧盡繫書矢上射城中說令降仍表於朝許以華州節制思綰開門納歛翌日從義具軍容入城憇候館中思綰入謁卽令武士執之并其黨三百餘人悉斬於市以功加同平章事周廣順初加兼侍中移鎮許州顯德初加檢校太師征劉崇請扈從世宗甚悅改天平軍節度卽令從符彥卿破遼師於忻口以功加兼中書令四年移鎮徐州恭帝加開

府階宋初加守中書令征揚州願扈從不允乾德二年爲河中尹護國軍節度六年疾歸開寶二年改左金吾衛上將軍逾年拜太子太師致仕四年卒年六十三贈中書令從義性重厚有謀略多技藝尤善飛白書子守忠閑廐副使守信字寶臣知書與士大夫游至東上閤門使知邢州卒子世隆比部員外郎世隆子昭祐承祐昭祐閤門祇候武行德榆次人身長九尺材貌奇偉家貧負薪遇晉祖獵郊外見其所負倍常令力士更負皆不能舉高祖奇之因留帳下天福初授奉國都校改控鶴指揮使寧國軍都虞侯契丹擾汴被獲行德僞請自效契丹信之令率軍校載什物鎧甲送歸其國拏舟數十沂汴至河陰相與潛謀曰我輩皆受國厚恩與其離鄉井投邊塞曷若共守河陽俟敵

兵退以圖富貴皆應曰諾卽共殺契丹監使分授器甲由汜水倍道抵河陽契丹節度崔廷勳出兵來拒行德麾衆逆擊自旦及午殊死戰廷勳大敗棄城走遂據河陽盡以府庫分給將士因推行德知州事厲士卒繕甲兵據上游士氣益奮人望歸之聞漢祖起自稱河陽都部署遣弟行友由間道奉表勸進授河陽三城節度使乾祐中加同平章事移成德軍廣順初加兼侍中改忠武軍遷河南尹西京留守時鹽禁甚嚴有關吏與僧希賞令僧從民媼鬻蔬密寘鹽筥中媼持入城吏擒以送府行德覺其誣釋媼斬僧及關吏部下凜然顯德初封譙國公世宗加兼中書令令完洛陽城改封邢國節度武寧疏導甬橋東南汙洋達於泗上尋爲濠州行營都部署破淮軍二千俄屯定遠爲

吳所敗方降五年復節度保大宋初加中書令封韓國改節忠武軍進魏國移鎮安州加開府儀同三司入爲太子太傅太平興國三年致仕卒年七十二贈太師

李萬超并州太原人幼孤貧負販以養母隸晉祖軍籍戰累捷稍遷校從討楊光遠奮勇先登飛石中其腦氣不屬者久之開運中從拒遼師於陽城流矢貫手拔矢復戰神色自若以功遷肅銳指揮使開運末以本部屯潞州主帥張從恩將棄城歸遼太宗會前驍衛將軍王守恩服喪私第從恩委以後事及遼使至專領郡務守恩遂無所預萬超奮曰我輩垂餌虎口苟延旦夕之命今欲殺使保其城非止逃生亦足建勲業汝曹能乎衆皆喜曰敢不唯命遂率所部大譟入府署殺其使推守恩爲帥列狀以聞漢祖從

其請仍命史弘肇統兵先渡河至潞見萬超曰得復此州公之力也吾欲殺守恩以公爲帥可乎萬超對曰若賊害於人自取其利非宿心也弘肇大奇之表爲先鋒馬步軍都指揮使路經澤州刺史翟奇堅壁拒命萬超馳至城下曰并州劉公仗大義定中土所向風靡後服者族盍早圖之奇乃開門迎納弘肇卽留萬超權州事遂爲刺史及征李守貞爲行營壕砦使河中平拜懷州刺史周初從征慕容彥超又爲都壕砦使以功授洺州團練使預收秦鳳改萊州從平淮南連移蘄登二州所至有善政屬有詔重均田租前牟平令馬陶隱苗不通命繫之將斬而後聞陶懼遁由是境內肅然宋初入爲右武衛大將軍遷左驍衛開寶八年卒年七十二

山西通志 卷一百五
張從恩并州太原人父存信振武軍節度後唐明宗嘗隸存
信麾下及卽位止授散秩從恩不得志乃退歸太原晉祖
鎮河東爲少帝娶從恩女晉初以外戚擢右金吾衛將軍
尋刺貝州遷北京副留守移澶州防禦使歷樞密副使宣
徽南院使權西京留守俄判三司爲襄陽行營兵馬都監
少帝初襄陽平遷檢校太尉開封尹充東京留守改鄴都
留守錫賚加等仍賜銀裝肩輿二俾迎其家明年加同中
書門下平章事命爲貝州行營都部署從恩至契丹將趙
延昭遁去詔與杜重威合兵三萬北伐開運初改天平軍
節度時十五將北征以從恩充北面行營都監二年移鎮
晉州又改潞州及契丹入汴從事高防曰公晉室之親宜
盡臣節從恩不聽棄城去巡檢使王守恩悉取其家財以

城歸漢漢祖至汴賜襲衣金帶鞍勒馬器幣以安慰之尋
拜右衛上將軍奉朝請周初遷左金吾衛征兗州從行世
宗加檢校太師封褒國公宋初改許國公以病免乾德四
年卒年六十九

王祚并州祁人初爲小吏有心計晉時掌鹽鐵案漢祖鎮并
州委經度芻粟卽位擢三司副使周爲隨商潁三州刺史
以俸錢募人開大秦山砦梯路行旅頌德遷鄭州團練使
宋初領宿州防禦使子溥執政始諷罷之

石曦并州太原人晉祖弟韓王暉之子天福中爲右神武將
軍歷漢至周爲右武衛左神武二將軍恭帝初爲左衛將
軍會高麗王昭加恩命副戴交充使宋建隆三年再使高
麗遷左驍衛大將軍護秦州屯兵西人犯邊擊破之斬渠

帥十三人太祖征晉領兵二千人自澤潞除道至太原壅汾水灌其城又益兵千人部攻遼州俄知雄州又爲潭州鈐轄開寶八年敗南唐軍二千餘於袁州平梅山板倉渚洞蠻寇俘馘數千人太平興國中歷右神武右羽林大將軍連知孟襄二州遷領誠州刺史雍熙四年改知霸州兼部署陳廷山謀以平戍軍入北邊曦察知定計擒之以功加領本州團練使同知鎮州淳化二年移原州遷右龍武軍大將軍請告詔特給全俸四年卒年七十四贈賻加等田景咸王暉皆太原人景咸仕漢奉國右廂都校從周祖入汴爲龍捷左廂都校改安國軍留後俄真拜節度世宗時改節武勝宋初爲左驍衛上將軍開寶三年卒景咸罷鎮常忽忽不樂妻識其意引徧閱囊儲景咸方自釋暉多誅

求世宗以先朝功臣知而弗問至右神武統軍建隆四年終右領軍衛上將軍

李洪信并州晉陽人漢昭聖太后弟六人洪信居長少善騎射後唐明宗在藩時隸帳下及卽位朱弘實總領捧聖軍擢爲爪牙漸遷小校廣順中少帝殺弘實而東捧聖軍數百騎從行洪信預焉及次衛州與晉高祖遇謀害之時漢祖方護晉祖洪信以兵應之獲免清泰中又爲邕王重美牙校晉初爲興順左廂都指揮使漢祖鎮太原奏隸麾下漢初領陳州刺史左護聖左廂都指揮使俄加岳州防禦使從降鄴以警扈勞授侍衛馬軍都指揮使領武信軍節度乾祐中求解軍職出爲鎮寧軍節度歲餘遷保義軍節度初楊邠令三司擇軍將分補諸鎮都押牙孔目官洪信

山西通志 卷一百五 二十九
聞內難卽召悉殺之周廣順初加同平章事洪信常以妄
殺自歎周祖猶因漢太后移鎮京兆兵不滿千王峻西征
又取去數百人及劉崇北遁遣禁兵千餘屯京兆洪信益
懼卽請入朝懇辭藩鎮拜左武衛上將軍世宗初遷左驍
衛顯德五年改右龍武軍統軍從北征爲合流口部署宋
乾德五年改左驍衛上將軍開寶五年致仕八年卒年七
十四洪信以外戚致位將相斂財累鉅萬時節鎮皆廣置
帳下親兵惟洪信最寡少弟洪義

李洪義洪信弟漢祖鎮太原補親校漢初授護聖左廂都校
領岳州防禦使遷侍衛馬軍都指揮使領武信軍節度隱
帝改鎮寧軍會誅楊邠史弘肇時侍衛步軍都指揮使王
殷屯澶州卽遣供奉官孟業賫密詔令洪義殺之又令護

聖都指揮使郭崇害周祖於鄴洪義素怯懦慮殷覺遷延
不敢發遽引業見殷殷乃錮業送密詔於周祖洎周祖起
兵詔扼河橋周祖兵至洪義降周廣順初權知宋州節度
尋真拜歸德軍加同平章事權知許州歲餘改鎮安州顯
德初加檢校太師世宗兼侍中尋徙青州六年夏遷京兆
尹永興軍節度恭帝加開府階宋初加兼中書令移鄜州
乾德五年代歸卒年五十九贈太師

李廷珪并州太原人七歲隸孟知祥帳下後從入蜀知祥僭
號補軍職累遷奉鬻肅衛都虞侯拔階州令領兵二萬出
子午谷援鳳翔始出谷聞趙贊爲王景崇所逼遂退軍權
知興元累遷閬州保寧節度護聖控鶴都指揮使周師攻
秦州以廷珪爲北路行營都統秦成階三州竟不能守復

爲左右衛聖諸軍馬步軍都指揮使俄加兼侍中蜀成都
巡檢使改遂州武信軍節度領本鎮及保寧軍都巡檢使
王全斌下劍關景遣廷珪與其子元喆將兵來拒至綿漢
狼狽而還所經州縣盡焚其儲蓄歸闕賜錢三百萬以償
川中田宅直爲右千牛衛上將軍乾德五年卒

張承德字抱一并州陽曲人丕曾孫事繼母劉以孝聞周祖
初爲侍衛吏與其父穎善乃以女妻承德承德迎其母妻
詣宋州周祖爲樞密使表供奉官押班乾祐中命賜潞帥
常遇生辰禮幣遇周祖之外兄弟也時周祖鎮鄴被讒承
德聞有密詔授遇探知其意謂遇曰願且以承德屬吏事
成足以爲德不成死未晚遇令壯士嚴衛然餽之甚厚未
幾周祖使至遇賀且謝曰老夫幾誤大事遂送承德歸周

祖周初封妻爲晉國公主授承德左衛將軍內殿直小底
四班都知加駙馬都尉領和州刺史逾年擢殿前都虞侯
領恩州團練使俄遷殿前都指揮使泗州防禦使時年二
十四顯德元年世宗戰高平大將樊愛能何徽退劔時宋
太祖與承德各領牙兵二千承德部下善左射厲兵分進
大捷降劉崇軍七千餘及駐上黨世宗晝臥帳中召承德
曰前日之戰主將殊不用命吾將案之以法承德曰今止
固守封疆則已必欲開拓疆宇威加四海宜痛懲其失世
宗擲枕於地大呼稱善翌日誅二將以徇軍威大振進攻
太原承德與符彥卿史彥超北控忻口契丹援兵至彥超
戰沒繼敗其衆二千餘衆遁去以承德領武信軍節度師
還徙義成軍時承德父穎爲隸人曹徽所害因奔南唐會

議南征永德請自効至壽春劉仁瞻堅壁不下永德出疲兵誘之傍伏精騎每戰陽不利北退三十里伏兵突起夾攻大敗之仁瞻僅以身免三年世宗親征至壽州仁瞻檻送澂等三人詔賜永德俾其甘心太祖與永德領前軍至紫金山吳人列十八砦壘西有高隴下瞰其營永德選勁弓強弩伏隴旁太祖麾兵直攻第一砦戰陽不勝淮人果空砦出鬪永德亟登隴發伏馳入據之敵衆散走翌日又攻第一砦鼓譟而進始攻北門淮人開南門遁時韓令坤在揚州遣永德率師援之又敗泗州軍千餘於曲溪堰俄屯下蔡時吳將林仁肇帥衆千餘水陸齊進又以船數艘載薪乘風縱火將焚周浮梁俄而風反永德進兵敗之又夜使習水者沒其船下縻以鐵鎖引輕舠急擊吳人旣不

得進溺者甚衆奪數十艘永德解金帶賞習水者乃距浮梁十餘步以鐵索千餘尺橫截長淮又維巨木自是備禦益堅俄又敗千餘衆於淮北岸獲船數十艘吳人多溺死詔褒美之冬擢殿前都點檢四年從克壽州還授檢校太尉領鎮寧軍節度五年夏命率步騎二萬拒契丹還駐澶淵解兵柄加檢校太尉同中書門下平章事恭帝時移鎮忠武宋初加兼侍中永德入朝授武勝軍節度召對後苑每呼駙馬不名時并汾未下太祖密訪其策永德曰太原兵少而悍加以契丹爲援未易取也臣以每歲多設游兵擾其農事仍發間使以諜契丹絕其援然後可下也上然之俄歸鎮會討金陵永德造戰船數十艘運糧萬斛自順陽沿漢水而下富民高進豪橫寘於法進潛詣闕誣永德

命樞密都承旨曹翰領騎兵察之得其實翰以進授承德
承德遽就市笞而釋之時稱其長者太平興國二年來朝
拜左衛上將軍五年降大將軍數月復舊秩六年進封鄧
國公雍熙中連知滄雄定三州端拱元年節度安化召還
爲河北兩路排陣使屯定州嘗與遼戰斬獲甚衆二年內
艱起復淳化初知鎮州二年改泰寧軍兼侍中出判并州
兼并代都部署承德明天文術嘗與僚佐會食有報遼兵
寇州境者承德用太白萬勝訣占之語坐客曰彼雖以年
月便利乘金而來反值歲星對逆兵家大忌必敗未幾折
御卿捷報至衆始歡伏轉運使王嗣宗言其販茶闌出罷
爲左衛上將軍真宗初進衛國公尋判左金吾街仗事咸
平初授太子太師分司西京仍以其孫大理寺丞文蔚釐

務洛下以便就養二年冬將北巡以承德宿將召入對賜
坐訪以邊要留爲東京內外都巡檢使三年授檢校太師
彰德軍節度知天雄軍俄以耄還鎮秋卒年七十三遣內
園使馮守規護柩還贈中書令諸孫遷秩者五人文蔚至
虞部員外郎文炳殿中丞

羅彥瓌太原人父全德晉沁州刺史彥瓌蔭補內殿直開運
初幸澶州欲賫詔宣慰大名城中特選勇敢士十人彥瓌
應募銜枚夜發衝突而入往返如期補興順指揮使後契
丹命送廐馬千匹赴幽薊至元氏聞漢祖起以馬歸太原
漢祖嘉之入汴擢護聖指揮使周初由散員都虞侯累遷
馬步軍都軍頭從向訓收秦鳳有功遷散指揮都虞侯陳
橋之變太祖自仁和門入俄頃宰相范質等至尚未及對

山西通志 卷一百五
彦瓌挺劍而前厲聲曰我輩今日必得天子太祖叱之不
退質等由是降階聽命擢控鶴左廂都指揮使改內外馬
軍都軍頭領眉州防禦使從平澤潞破李筠衆於碾子谷
還爲侍衛步軍都指揮領武信軍節度使建隆二年出鎮
彰德軍乾德二年復改安國軍與李繼勳大破契丹兵四
年春又與田欽祚破太原軍于靜陽擒其將鹿英明年移
鎮華州開寶二年卒年四十七

吳延祚字慶之并州太原人事周祖爲親校廣順初授莊宅
副使遷內軍器庫使知懷州入爲皇城使苻彥卿鎮大名
以延祚權知鄆州世宗初遷右羽林將軍充內客省使尋
拜宣徽北院使征劉崇爲北面都巡檢使權判澶州加右
監門衛大將軍俄遷宣徽南院使判河南府知西京留守

事汴河決督丁壯數萬塞之增築堤防自汴城至臨淮數
旬訖工世宗北征權東京留守夏河決鄭州原武發近縣
丁壯三萬餘塞之爲左驍衛上將軍檢校太傅樞密使恭
帝加檢校太尉宋初加同中書門下三品征李筠廷祚曰
潞城岳險且阻太行賊據之未易破也筠素勇而輕若速
擊之必離上黨來邀我戰猶獸亡其藪魚脫於淵因可擒
矣太祖遂行以廷祚留守東京兼判開封府筠果領兵來
戰澤州南敗走討李重進又爲東京留守建隆三年夏爲
雄武軍節度秦州夕陽鎮西北多材植高防知州議就置
采造務西夏酋尚波于率衆爭奪令廷祚代防賫詔赦尚
波于等夏人感悅是年秋以伏羌地來獻乾德二年改鎮
京兆開寶四年來朝俄疾駕臨問命藝艾灸其腹尋卒年

五十四贈侍中官給葬事廷祚謹厚寡言性至孝母喪絕水漿累日好學聚書萬餘卷治家嚴尤奉釋氏子元輔元載元範元晟元吉元慶元範元慶皆禮賓副使元吉閣門祗候元吉子昭允太子中舍元慶子守仁內殿崇班

吳元輔字正臣廷祚子好學善筆札周廣順中補供奉官世宗遷洛苑使宋初授左驍衛將軍澶州巡檢累官定州鈐轄卒年四十八子昭德昭遜昭普並閣門祗候

王溥字齊物并州祁人祚子漢乾祐中舉進士甲科爲秘書郎周祖討三叛辟從事河中平得朝貴及藩鎮交結書將按之溥諫魑魅之形同夜而出日月旣照氛沴自消願一切焚之以安反側周祖從之師還遷太常丞從鎮鄴廣順初授左諫議大夫樞密直學士二年遷中書舍人翰林學

士三年加戶部侍郎改端明殿學士拜中書侍郎平章事宣制畢周祖曰吾無憂矣世宗將親征澤潞獨贊成之凱還加兼禮部尚書監修國史世宗嘗從容問曰漢相李崧以蠟書與遼信有之耶溥曰崧爲大臣設有此謀肯輕示外人蓋蘇逢吉誣之耳乃詔贈其官將討秦鳳求帥于溥溥薦向拱事平世宗因宴酌酒賜溥曰爲吾擇帥成邊功者卿也從平壽春加階爵顯德四年丁艱起復四表乞終喪乃入謝六年夏命參知樞密院事恭帝加右僕射冬表請修世宗實錄遂奏扈蒙張淡王格董淳同加修纂從之宋初進位司空罷參知樞密院乾德二年罷爲太子太保舊制一品班臺省後上因見溥謂左右曰溥舊相當罷異之卽令分東西班遂爲定制五年服闋加太子太傅開寶

山西通志 卷一百五
二年遷太子太師中謝太祖曰溥十年作相三遷一品福履之盛近世未見其比太平興國初封祁國公七年八月卒年六十一輟朝二日贈侍中謚文獻溥性寬厚美風度好汲引後進所荐至顯位者甚衆好學手不釋卷嘗集唐會要百卷五代會要三十卷有集二十卷子貽孫貽正貽慶貽序貽正至國子博士貽慶比部郎中貽序景德二年進士後改名貽矩至司封員外郎貽孫累遷右司郎中尤知名貽正子克明

伊審徵字申圖并州人父延瓌隨孟知祥入蜀知祥以女妻之僭封崇華公主延瓌歷陵嘉眉三州刺史審徵至孝母病割股肉啖之以父任歷蜀州刺史雲安權鹽使廣政十四年召爲通奏使知樞密院事久之領蜀州刺史命檢校

城砦俄領武泰軍節度選其子崇度尚公主又改節寧江同平章事與王昭遠並掌機務昶事無大小咸咨之常自以康濟經略爲已任宋師入境首奉降表授靜難軍節度乾德六年移鎮延安開寶末入朝改右屯衛上將軍太平興國二年判右金吾衛仗雍熙五年卒年七十五

慕容延釗太原人父章襄州馬步軍都校領開州刺史延釗少以勇幹聞隸周祖帳下補西頭供奉官歷尚食副使鐵騎都虞侯世宗授殿前散指揮使都校領溪州刺史高平之戰督左先鋒有功陞虎捷左廂都指揮領本州團練使遷殿前都虞侯領睦州防禦使征淮南改龍捷左廂都校泂江馬軍都部署歸爲殿前都虞侯出爲鎮淮軍都部署顯德五年世宗駐迎鑿江口聞吳水艦數百泊東沛洲進

爲左神武統軍命引驍騎由陸路進宋延偃督舟師沿江
繼之遂大破敵淮南平遷殿前副都指揮使領淮南節度
使恭帝改鎮寧軍充殿前副都點檢與宋祖同官友善宋
祖常兄事之復爲行營馬步軍都虞侯以先鋒重兵屯於
真定宋初遣使諭旨許以便宜從事加殿前都點檢同中
書門下三品數遣問勞猶以兄呼之延釗按治邊境以鎮
靜聞征李筠與王全斌由東路會兵進俄爲行營都部署
知潞州行府事平加兼侍中還澶州建隆二年來朝賜宅
一區徙山南東道節度西南面兵馬都部署冬太寒賜貂
裘百子氈帳四年春爲湖南道行營前軍都部署時被病
御封藥以賜令肩輿卽戎賊將汪端與衆數千擾朗州擒
之磔於市荆湘平加檢校太尉冬卒年五十一贈中書令

追封河南郡王錄其子德業至衛州刺史德鈞至尚食副
使弟延忠內殿直歷供奉西頭官都知磁州刺史延卿至
虎捷都指揮使

李進卿并州晉陽人以驍勇隸護聖軍晉天福中杜重威敗
安重榮於宗城力戰有功擢興順軍校周祖命戍靈壽以
之遷龍捷指揮使顯德初從戰高平改鐵騎歷散員左射
都校鐵騎內殿直都虞侯宋初領貴州刺史三遷鐵騎左
廂都指揮使領乾州團練使遷控鶴領漢州虎捷領澄州
伐蜀爲歸州路行營步軍都指揮使拔巫山砦下夔萬二
州拜侍衛親軍步軍都虞侯領保順軍節度使親征河東
留爲在京都巡檢還改親軍馬軍都虞侯遷步軍都指揮
使改節靜江卒年五十九贈侍中子延信內殿崇班

楊美并州文水人本名光美避諱省狀貌雄偉武力絕人以
豪俠自任周祖征三叛杖策詣軍門與語壯之留帳下廣
順初累遷禁軍大校世宗征淮南以功擢鐵騎都指揮使
領白州刺史與宋祖故舊卽位授內殿直都知建隆三年
爲北海軍使政尚簡易民咸德之乾德二年召還北海民
詣闕乞留詔諭之不去答爲首者始罷遷馬步都頭討蜀
爲歸州路戰擢左右廂都指揮使蜀平遷內外馬步軍副
都軍頭領恩州團練使改領端州防禦使加都軍頭領宣
州觀察使俄授虎捷左右廂都指揮使領河西軍節度使
征太原爲行營馬軍都虞候太平興國二年出爲保靜軍
節度使以疾解官詔遣內侍與道士馬志視之卒年四十
八贈侍中命中使護葬美任氣好施凡得賜予及俸祿盡

賙親故死之日家無餘財人多嘆息之

王守忠晉陽人父審琦周封陳王守忠累官衛州刺史入宋
知興元太宗時歷知數州累遷威德軍觀察留後爲治簡
靜喜與士大夫游時論多之

常延信并州平晉人祖思周昭義歸德平盧三鎮節度延信
補牙職領和州刺史思卒入爲六宅使建隆初改領平州
坐事貶右監門衛副率領護滑州黃河隄開寶中爲汴河
南巡檢出爲潼關監軍關路巖險奏易道路及填禁院役
工四十餘萬又監通許鎮兵改梓遂十二州都巡檢使賜
袍帶錢百萬太平興國初再任賜錢四十萬捕殺亡命百
餘人又爲唐鄧都巡檢代還改右清道右司禦雍熙三年
督鎮州北芻糧冬爲全邵六州都巡檢使令疾置之任就

充羊狀六砦都鈐轄遷右衛副率馳入溪洞索誠州蠻歸
欵要領又直趣古鎮過西延大水諸洞蠻人懼伏淳化中
歷襄鄧宋曹等州都巡檢使改左監門衛將軍屢部徒修
護河防改左領軍左屯衛充西京水南都巡檢使擒彭婆
鎮甲馬營盜咸平中歷太康鞏縣二監軍景德二年卒年
六十四

王全斌并州太原人幼穎敏其父事唐莊宗爲岢嵐軍使私
畜勇士百人莊宗召之懼不敢行全斌時年十二請以已
爲質果獲全因隸帳下莊宗入洛累遷內職同光之難近
臣宿將皆遁全斌獨與符彥卿等居中拒戰明宗初補禁
軍列校晉初從侯益破張從賓遷護聖指揮使周廣順初
爲龍捷右廂都指揮使討慕容彥超爲行營馬步都校從

向拱平秦鳳領恩州團練使遷領泗州防禦從世宗平淮
南復瓦橋關改相州留後宋初與慕容延釗由東路會大
軍進討李筠以功拜安國軍節度使詔完葺西山堡砦不
踰時而就建隆四年與郭進等克樂平乾德二年伐蜀拜
忠武軍節度西川行營前軍都部署率禁軍步騎二萬諸
州兵萬人由鳳州路進討召示川陝地圖授以方畧奏曰
臣等仗天威遵廟謨刻日可定上曰卿能如此吾復何憂
十二月率兵拔乾渠渡萬仞燕子二砦遂下興州蜀刺史
藍思綰退保西縣敗蜀軍七千獲糧四千餘萬斛進拔石
圖魚關白水二十餘砦先鋒史延德進軍三泉敗蜀軍數
萬擒招討韓保正副使李進獲糧三十餘萬斛旣而崔彥
進康延澤等逐蜀軍過三泉遂至嘉陵俘獲甚衆蜀人斷

閣道軍不能前議取羅川路延澤彥進謂其路險軍難並進不如分兵治閣道與大軍會於深渡全斌然之命二將督治數日而成進擊金山砦破小漫天砦全斌繇羅川趣深渡與彥進會蜀人依江列陣以待彥進遣張萬友等奪其橋會暮蜀人退保大漫天砦詰朝彥進延澤萬友分三道進擊蜀人悉其精銳來逆戰又大破之乘勝拔其砦蜀將王審超監軍趙崇渥遁去復與三泉監軍劉延祚樞密王昭遠澤州節度使趙彥韜引兵來戰三戰三敗追至利州北昭遠遁渡桔栢江焚其梁退守劔門遂克利州得糧八十萬斛自利州趨劔門次益光時京城大雪上設氊帷于講武殿衣紫貂裘帽視事謂左右曰我被服若此體尚覺寒念西征將士衝犯霜雪何以堪處卽解裘帽遣中黃

門馳賜全斌仍諭諸將曰不能徧及也全斌拜賜感泣會諸將議曰劔門天險宜各陳進取之策侍衛軍頭向韜曰降卒牟進言益光江東越大山數重有狹徑名來蘇蜀人於江西置砦對岸有渡自此出劔關南二十里至清强店與大路合於此進兵卽劔門不足恃也全斌卽欲卷甲赴之延澤曰來蘇細徑不須主師親往且蜀人屢敗并兵退守劔門命一偏師趣來蘇若達清强北擊劔關與大軍夾攻破之必矣全斌納其策命史延德分兵趨來蘇造浮梁于江上蜀人見梁成棄砦而遁昭遠聞延德兵趨來蘇至清强卽引兵退陣於漢源坡獨留偏將使守劔門全斌等擊破之昭遠彥韜皆走遣輕騎獲送闕下遂克劔州殺蜀軍萬餘四年正月師次魏城孟昶遣使奉表降全斌等入

成都旬餘劉廷讓等始自峽路至昶餽遺及犒師並同全
斌詔書頒賞諸軍亦無差降由是兩軍相嫉帥亦不協全
斌雖小事不能卽決會詔發蜀兵赴關遂有全師雄之擾
分兵招輯賊衆始息召還令中書問狀責授崇義軍觀察
留後開寶末幸洛陽郊祀召入侍祠面諭曰朕以江左未
平慮征南諸將不遵紀律故抑卿數年爲朕立法今已克
金陵還卿節鉞授武寧軍節度使仍以銀器萬兩帛萬匹
錢千萬賜之至鎮數月卒年六十九贈中書令天禧二年
錄其孫永昌爲三班奉職全斌輕財重士不求聲譽寬厚
容衆軍旅樂爲用黜居山郡十餘年怡然自得識者稱之
王審鈞全斌子由崇儀使領富州刺史爲廣州兵馬鈐轄轉
永興軍駐泊都監以擊賊死弟審銳供奉官閤門祇候

郭守文并州太原人父暉漢護聖軍使從周祖征河中戰死
守文年十四居喪哀毀周祖召隸帳下廣順初補左班殿
直遷東第二班副都知宋初遷西頭供奉官選知簡州時
劍外多寇胥招來之從征嶺南會擒劉鋹遷翰林副使從
平金陵護送李煜歸闕好語慰之煜心遂安改西京作坊
使領翰林司事俄從党進破并寇於團栢谷太平興國初
乘傳撫諭蕃部西夏悅伏三年遷西上閤門使夏汴水決
寧陵董宋亳丁壯四千五百塞之冬又護塞靈河縣決河
征太原分護行營馬步軍會劉繼文據代州討平之俄護
定州屯兵大破遼于滿城以功遷東上閤門使領澶州刺
史召拜內客省使八年滑州房村河決命塞之率禁兵數
萬援雄州遼人遁去雍熙二年屯三交領武州團鍊使破

夏州鹽城鎮岷羅臙等十四族斬首數千級俘獲生畜萬計又破咩嵬族殲焉銀麟三州歸附者凡百二十五族萬六千餘戶西鄙遂寧五年春爲幽州道行營前軍步軍水陸都監爲遼流矢所中氣色不撓督戰益急軍中服其量坐退軍左遷右屯衛大將軍明年復職拜宣徽北院使又爲北面排陣使屯鎮州拱端初改南院使鎮州路都部署又爲北面行營都部署兼鎮定高陽關兩路排陣使冬大破遼騎于唐河端拱三年卒年五十五贈侍中謚忠武追封譙王遣中使護喪歸葬守文沉厚有謀略朝退習書百行出言溫雅未嘗忤人意故岐溝旣敗命以內職總兵鎮常山經略之中使言守文死軍士皆流涕上問何得此對曰守文得俸祿賜賚悉犒勞士卒死之日家無餘財上嗟

嘆之賜其家錢五百萬爲真宗納其女爲夫人卽章穆后也子崇德太子中舍崇信西京左藏庫使同知皇城司贈福州觀察使諸司使無廢朝贈官例崇信崇儼咸特示優禮崇德子承壽虞部員外郎天禧五年錄承壽子若水爲太常寺奉禮郎崇仁爲解州團練使

袁繼忠振武人徙并州父進周階州防禦使繼忠蔭補右班殿直宋平澤潞討并汾悉預攻戰征蜀隸劉廷讓有功知雲安軍歷嘉蜀二州監軍伐廣南爲先鋒壕砦遷供奉官護隰州白壁關屯兵累入河東境破三砦近戍主將懼無功以所獲分與之改天平軍巡檢太宗初遷閤門祇候擊破梅山洞賊又巡邊部於唐龍鎮從征太原預破鷹揚軍先登陷陣遼師入代境擊走之遷通事舍人護高陽關

屯兵破遼師長城口殺獲數萬璽書褒美趙保忠獻地綏州刺史李克憲偃蹇遣繼忠諭旨竟率克憲入朝遷西上閣門副使定河西諸州大破西人於葭蘆州遷引進副使護定州屯兵遷西上閣門使雍熙三年爲定州路行營馬步軍都監從田重進取飛狐下靈邱平蔚州擒其帥大鵬翼師還殿後行列甚整重進欲殺降卒繼忠救免之遷判四方館事領播州刺史易州靜塞騎兵尤驍果李繼隆取隸麾下旣而契丹陷靜塞城盡俘騎兵妻子繼隆疑軍怨已欲分隸諸將繼忠曰不可但奏升其軍額優以廩給使之盡節可也衆皆感悅繼忠因自請隸麾下會遼師駐唐河北諸將欲堅壁待之繼忠曰今疆敵在近城中屯重兵不能剪滅顧令長驅深入豈折衝禦侮之道乎我將身先

士卒死於寇矣辭氣慷慨衆壯之靜塞軍摧鋒先入遼師大潰璽書獎諭厚賜予之遷引進使護鎮定高陽關兩路屯兵卒年五十五繼忠長厚忠謹士大夫多與遊前後賜賚鉅萬悉以犒士旣死家無餘蓄子用成雍熙初第進士至太常博士

安守忠字信臣并州晉陽人父審琦周平盧節度使封陳王晉天福中領山東道署牙內指揮使領繡州刺史顯德四年改鞍轡庫使初下淮南命馳往宣諭抗以正禮無所辱命改衛州刺史宋祖居潛雅相厚善卽位授左衛將軍自處益謙及從征太原多與謀略人罕知之建隆四年湖南平命爲永州刺史乾德中護河陰屯兵蜀平特命知興元府尋改漢州刺史朝使旁午出私錢給用太祖每戒使者

山西通志 卷一百五
言守忠在蜀能律已以正汝行見之當效其爲人開寶初
改濮州副曹翰塞澶州決河五年知遼州部民陰召并人
斬以徇九年入賊境燔砦四十餘議將深入會班師太平
興國初移知靈州雍熙二年改易州徙夏州每西戎犯邊
戰無不捷錄功就拜濮州團練使端拱中知滄州又知瀛
州兼高陽關駐泊部署遷瀛州防禦使淳化二年徙雄州
方宴軍校擐甲及闔守忠言笑自若徐顧坐客曰此輩酒
狂爾擒之可也人服其量尋加耀州觀察使條陳邊事稱
旨賜錢五百萬五年移滄至道初復移雄三年復移滄拜
威德軍節度觀察留後徙宋州兼制置營田使威德兼著
吏民不忍其去咸平三年入覲遣還卒年六十九贈太尉
錄其子繼昌供備庫副使壻王世及光祿寺丞守忠謹慤

淡薄爲治簡靜樂施予豐宴犒且喜從士大夫遊時論多
之以父愛妓爲隸人所戕終身不蓄嬖妾而尤嗜佛云

山西通志卷第一百五

砦之策求領邊任召見自陳武藝具裝執鞬馳騎揮鐵鞭
棗槊旋繞廷中數四又引其四子必興必改必求必顯以
入更迭舞劔槃槊賜白金衣帶端拱二年領富州刺史再
加都軍頭爲保州刺史冀州副都部署改遼州刺史復爲
都軍頭領扶州刺史加康州團練使咸平二年從幸大名
爲行宮內外都巡檢上嘗補軍校皆敘已功贊獨進曰臣
月俸百千所用不及半忝幸多矣不敢更求遷擢再拜而
退三年卒贊有膽勇驚悍輕率常言願死於敵徧文其體
爲赤心殺賊字至妻孥僕使皆然諸子耳後刺曰出門忘
家爲國臨陣忘生爲主所作破陣刀降魔杵鐵折上巾兩
旁有刃皆重十數斤絳帕首乘騅馬冬月嘗以水沃孩幼
冀長耐寒而勁健必顯後擢副都軍頭

吳元載廷祚子建隆初授太子右春坊通事舍人賜緋魚袋
廷祚鎮秦雍補衙門都校後授供奉官太平興國三年加
閣門祇候使遼九年擢西上閣門副使出知陝州雍熙三
年徙秦州州民李益爲長道縣酒務官家饒財僮奴數千
指長吏皆畏之民負息錢郡爲督理推官馮伉不從益遣
奴拽下馬毀辱之伉屢表不得達後因市馬譯者附表以
聞詔元載逮捕權貴已報益益亡命物色急捕之獲於河
中府民郝氏家御史府具得其狀斬之益子光祿寺丞仕
衡除籍民皆飯僧相慶端拱初遷西上閣門使淳化二年
領富州刺史俄徙知成都府王小波擾不能捕滅受代歸
時李仕衡通判華州遣人閱行裝元載拒之仕衡抗章疏
其罪坐責郢州團練副使移單州授左衛將軍致政卒年

五十三子昭明內殿崇班昭矩太子中舍

楊業并州太原人父信漢麟州刺史業幼侗儻任俠善騎射
畋獵恒倍獲嘗曰我他日用兵亦猶用鷹犬逐雉兔爾弱
冠事劉崇爲保衛指揮使以驍勇聞累遷建雄軍節度使
屢立戰功所向克捷國人號爲無敵太宗征太原素聞其
名嘗購求之旣而業勸其主繼元降上遣中使召見業大
喜以爲右領軍衛大將軍授鄭州刺史上以業老於邊事
復遷代州兼三交駐泊兵馬都部署密封橐裝賜予甚厚
會遼師入鴈門自西陘出由小陘至鴈門北口南嚮背擊
之遼師大敗以功遷雲州觀察使仍判鄭州代州自是遼
人望見業旌旗卽引去主將戍邊者多忌之或潛上謗書
上皆不問封其奏以付業雍熙三年北征命業副潘美爲

雲應路行營都部署以西上閣門使王侁軍器庫使劉文
裕護其軍諸軍連拔雲應寰朔四州師次桑乾河會班師
美等歸代州未幾詔遷四州民於內地令美等以所部兵
護之時遼復陷寰州業謂美等曰宜領兵出大石路先遣
人密告雲朔州俟大軍離代州日令雲州衆先出我師次
應州卽令朔州民出城直入石碣谷遣强弩千人列谷口
以騎士援於中路庶保萬全侁曰但趨鴈門北川中鼓行
而往文裕亦贊成之業曰不可此必敗之勢也侁語侵之
業曰業非避死蓋時有未利徒令殺傷士卒而功不立今
君責業以不死當爲諸公先將行泣謂美曰此行必不利
業太原降將分當死上不殺寵以連帥授之兵柄非縱敵
不擊蓋伺其便將立尺寸功以報國恩今諸君責業以避

敵業當先死於敵因指陳家谷口曰諸君於此張步兵彊弩爲左右翼以援俟業轉戰至此卽以步兵夾擊救之不然無遺類矣旆陣谷口使人望之以爲遼師敗走欲爭其功卽領兵離谷口美不能制業力戰至暮果至谷口望見無人卽再率帳下士力戰身被數十創士卒殆盡業猶手刃數十百人馬重傷遂爲遼人所擒其子延玉亦沒焉業太息曰上遇我厚期討賊捍邊以報而爲姦臣所迫復何面目求活耶乃不食三日死上聞之痛惜甚下詔曰執干戈而衛社稷聞鼓鼙而思將帥盡力死敵立節邁倫不有追崇曷彰義烈故雲州觀察使楊業誠堅金石氣激風雲挺隴上之雄才本山西之茂族自委戎乘式資戰功方提貔虎之師以效邊陲之用而羣帥敗約援兵不前獨以孤

軍陷於沙漠勁果焱厲百死不回求之古人何以加此是用特舉徽典以旌遺忠魂而有靈知我深意可贈太尉大將軍節度賜其家布帛千匹粟千石大將軍潘美降三官監軍王侁劉文裕胥除名業不知書忠烈武勇有智謀練習攻戰與士卒同甘苦代北苦寒但挾纊露坐理軍事傍不設火侍者殆僵仆而業怡然無寒色爲政簡易御下有恩故士卒樂爲之用朔州之敗麾下尚百餘人業謂曰汝等各有父母妻子與我俱死無益也可走還報衆皆感泣不肯去淄州刺史王貴殺數十人矢盡遂死餘亦死無一生還者聞者皆流涕朝廷錄其子供奉官延朗崇儀副使次子殿直延浦延訓供奉官延環延貴延彬殿直馬峰并州太原人仕劉繼元至樞密使左僕射致仕太原平

爲將作監遷太府卿分司西京峰善服餌養生體強無疾頗好持論雍熙元年卒年八十餘

王貴并州太原人廣順初補衛士宋初累遷散員都指揮使馬步軍都軍頭領勝州刺史太平興國二年爲淄州刺史從潘美北征攻沁州立戰功及從楊業射殺遼兵數十人矢盡張空拳又擊殺數人遂遇害年七十三擢其子文晟供奉官文昱殿直

張繼能字守拙并州太原人父贊晉內班繼能建隆初以黃門事禁中太平興國初爲內品從征河東主城南洞屋遷高品爲高陽鎮定路先鋒都監從崔彥進戰長城口多所俘馘明年又與彥進敗遼於唐興口轉殿頭高品雍熙中監李繼隆軍徙護定州屯兵領驍捷卒三千屯五回嶺端

拱初遷入內殿頭從趙保忠討李繼遷保忠薦其材命同經略代還掌內弓箭庫淳化三年與白承睿護芻粟入靈武命領驍卒五千同諸將主軍務俄爲本州都監城威州清遠軍護其役工畢命同張延洲知軍事又同田紹斌掌積石砦遷內供奉官靈環慶清遠軍後陣都監轉鬪敗西人復還清遠遷內殿崇班供備庫副使復護環州屯兵徙涇原儀渭都巡檢使真宗遷崇儀使靈環十州軍兵馬都監兼巡檢安撫使咸平三年爲川陝兩路招安巡檢使成都平留爲利州招安巡檢復爲邠寧駐泊都監坐清遠軍陷又焚棄青岡砦流儋州景德二年赦爲內侍省內常侍又爲陝西捕賊巡檢獲千餘人改內殿崇班朝陵爲行宮四面巡檢四年討宜州卒陳進爲廣南東西路安撫副使

賊平授供備庫使東封留爲舊城內巡檢鈐轄加東染院使大中祥符二年擢入內侍省副都知時宗室說書給公膳專遣主之俄提點郡縣主諸院事三年兼羣牧都監祀汾陰留掌大內兼舊城內巡檢鈐轄領會州刺史謁太清宮爲天書扶持都監七年爲涇原儀渭鎮戎軍兩路鈐轄徙鄜延都鈐轄先是內屬戶殺漢口者止罰孳畜繼能則麗於常法繇是西人不敢犯日課卒截竹爲簽署字其上備將士記殺獲功狀賊聞之甚懼歸朝復蒞羣牧仁宗在儲宮嘗親書一幅賜之繼能以聞眞宗亦爲標題其末人以爲榮九年左授西染院使掌往來國信天禧初復西京左藏庫使坐事降授西京作坊使出爲邠寧鈐轄掌瑞聖園尋領往來國信所三年復西京左藏庫使內侍右班

副都知遷崇儀使轉內園使掌瓊林苑五年卒年六十五特贈汀州團練使錄其子懷忠大理寺丞孫逃三班奉職遜借春坊祗候繼能性沉密知兵喜讀書而好治生云

慕容德豐字日新延釗次子幼聰悟八歲父鎮山南補衙內指揮使父卒授如京使征太原領御砦南面巡檢征南唐爲洞子都監尋爲昇州都監以廉潔聞俄領蔚州刺史太平興國二年知愛州兼邠寧都巡檢使嘗破小遇族奪名馬數十匹詔褒諭居任九年簡靜爲治邊鎮安之雍熙四年使登萊閱強壯還拜西上閣門使出爲定遠軍鈐轄命領後陣中隊別將萬騎以禦邊屢知邢延二州又代侯延廣知靈武就賜白金三千兩改四方館使徙慶州又改靈州兼部署穀貴出私廩賑饑全活者衆轉引進使賊入境

擊走之咸平二年遷客省使知鎮州遼南侵繕兵固守餉饋不絕詔獎之改知滄州德豐輕財好施厚享將士身居邊陲母與妻孥尚留京貧甚特給團練使俸尋進潁州團練使知貝瀛二州五年卒年五十五家無餘財子惟素至殿內承制

慕容德琛延釗從子蔭補供奉官累遷內殿崇班知夔州李順黨張餘領衆十萬舟千艘來寇與戰龍山斬首千餘級又與白繼贊擊斬二萬餘悉焚其舟賊剽開州圍雲安德琛往援又斬百餘級累詔褒諭歷西京作坊左藏副使咸平二年轉崇儀荆湖北路鈐轄蠻擾澧鼎境與戰於北汭奪耕牛鎧甲斬馘以歸徙峽路鈐轄未至復知夔州景德中領梧州刺史復任峽路遷莊宅使并代鈐轄知憲州天

禧初改右監門衛大將軍

尹憲并州晉陽人開寶中事太宗藩邸卽位擢殿直充延州保安軍使改供奉官太平興國四年護府州屯兵與鄜州三族會攻嵐州破敵千餘擒知州馬延忠拔緣河諸砦以功轉西京作坊副使入朔州界破寧武軍殺其軍使獲人馬器甲甚衆轉供備庫使護夏州兵殺戮三汭醜奴莊岌伽羅膩葉十四族及誘其渠帥屢降詔書褒美雍熙初就知夏州攻破地斤澤李繼遷遁走俘獲四百餘帳憲奏請抽移諸帳於所部別置騎兵號曰平砦以備用詔從之俄殺蘆關及南山野狸數族代還爲洪州巡檢尋護莫州屯兵三年知瀛州兼兵馬鈐轄淳化初爲四方館使連護鎮定屯兵改知貝州移高陽關兵馬鈐轄五年知定州與部

署王榮不協榮毆憲仆因疾卒年六十三

劉通并州人曾祖質絳州刺史祖維嶽父延慶右驍衛將軍
通嘗從潘美征廣南又累戰北面積勞至虎捷都指揮使
領嘉州刺史太平興國中扈蹕太原卒贈潁州防禦使長
女爲真宗妃大中祥符五年妃正位累贈維嶽天平軍節
度中書令兼尚書令延慶彰化軍節度許國公通太師尚
書令魏王謚武懿累追封祖母宋氏安國太夫人母河南
縣君元氏育國太夫人妻龐氏晉國太夫人女壻龔知進
贈衛尉卿知進妻追封南安郡君初通窆汴城西天禧二
年七月具鹵簿鼓吹改葬於祥符鄧公原后親臨奠真宗
御製祭文置靈坐右

吳元辰字君華廷祚子太平興國八年尚蔡國公主授左衛

將軍駙馬都尉明年領愛州刺史進團練使雍熙三年表
求試劇郡命知鄆州尋知河陽還朝改鄆州觀察使特詔
朝會序班次節度使祿賜悉增之再知河陽淳化五年秋
霖河溢城將壞元辰躬涉泥滓督工補塞民多構木樹抄
命濟以舟楫設餅餌以食時澶陝悉罹水災河陽賴以安
真宗初換安州觀察使知澶州咸平三年轉運使劉錫上
其治狀詔嘉獎遷寧國軍留後知定州時王超王繼忠踰
唐河與遼戰元辰度其必敗急發州兵護河橋超輩果敗
遼人乘之至橋見陣兵甚盛遂引去考滿吏民詣闕貢馬
疏其善政十事願借留樹碑表德政詔褒之屬歲旱吏白
召巫以土龍請雨元辰曰巫本妖民龍止獸也安能格天
惟精誠可以動天乃設壇繫齋三日百拜祈禱澍雨沾洽

景德三年代歸拜武勝軍節度三年爲修諸陵都部署出知潞州初并代澤潞皆分轄戍卒後并於太原至是以元辰臨鎮遂分領澤潞晉絳慈隰威勝七州軍戎事委元辰專總之加檢校太傅知徐州大中祥符四年改領山南東道卒年五十贈中書令謚忠惠子弟進秩者五人五年葬時上元欲觀燈上爲移次夕元辰性謹讓待賓佐以禮喜讀春秋左氏聲色狗馬不介意祿賜卽給親族公主乳媪得入參宮禁元辰慮其妄有請託白上拒之眞宗深所嘉嘆於駙馬中獨稱其賢及歿甚悼惜之子守禮六宅使澄州刺史以國甥特贈和州防禦使守嚴內殿崇班天禧中錄守嚴子承嗣承緒殿直守良內殿崇班守讓閤門祇候楊延昭本名延朗後改焉業之子也幼沉默寡言多戲爲軍

陣業曰此兒類我征行必從太平興國中補供奉官業攻應朔延昭爲先鋒戰朔州城下流矢貫臂鬪益急以崇儀副使知景州爲江淮南都巡檢使改崇儀使知定遠軍徙保州緣邊都巡檢使就加如京使咸平二年冬遼攻遂城城小無備長圍數日遼蕭后督戰衆心危懼延昭悉集城中丁壯登陴賦器甲護守會大寒汲水灌城上旦悉爲氷堅滑不可上遼人潰去獲鎧仗甚衆以功拜莫州刺史屢請益兵於傅潛不許及潛抵罪召赴行在屢得對訪以邊要上甚悅指示諸王曰延昭父業爲前朝名將延昭治兵護塞有父風深可嘉也厚賜遣還是冬遼南侵延昭伏銳兵于羊山西自北掩擊且戰且退及西山伏發遼衆大敗獲其將函首以獻進團練使與保州楊嗣並命上謂宰相

曰延昭等並出踈外以忠勇自效朝中多忌朕力保庇以
及此五年遼侵保州延昭與嗣未成列爲遼所襲命李繼
宣王何代之上曰延昭素以勇聞當觀其後效六年夏遼
復侵望都繼宣逗遛復命延昭爲都巡檢使條上防秋利
害又徙寧邊軍部署景德元年詔益延昭兵滿萬人如遼
騎入寇則屯靜安軍東令莫州部署石普屯馬村西以護
屯田斷黑盧口萬年橋奔衝路仍會諸路兵犄角追襲令
魏能張凝田敏奇兵牽制之時王超爲都部署不聽隸屬
延昭上言遼師頓澶淵去北境千里人馬俱乏雖衆易敗
凡有剽掠率在馬上願飭諸軍扼其要路衆可殲焉卽幽
易數州可襲而取不報乃率兵抵遼境破古城俘馘甚衆
及請和選邊州守臣御筆命知保州兼緣邊都巡檢使二

年追敘守禦勞進防禦使俄徙高陽關副都部署在屯九
年大中祥符七年卒年五十七延昭智勇善戰所得俸賜
悉犒軍未嘗問家事出入騎從如小校號令嚴明與士卒
同甘苦遇敵必身先行陣克捷推功于下故人樂爲用在
邊防二十餘年遼人憚之目爲楊六郎及卒上嗟悼之遣
中使護櫬歸河朔人多望柩而泣錄三子官常從門客亦
試藝敘之

鄧守恩并州人十歲以黃門事太宗淳化中從王繼恩討成
都盜至道初就護西蜀屯兵咸平初以大內高班爲鎮定
都監入掌騏驥院龍騎卒剽環慶往擒翦之景德初爲澶
濮都巡檢又使環慶戎瀘巡察邊事大中祥符初按獄濮
州雪寃人十餘預監修玉清昭應宮會靈觀七年兼修真

遊殿景靈宮累遷大內高品供奉官宮成遷內殿承制八年預修大內改西京作坊副使九年營造皆畢授東染院使充會靈觀都監天禧二年掌軍頭引見司修祥源觀成遷崇儀使三年授大內押班爲修滑州决河鈐轄改如京使還任四年春河復故道遷文思院使歸領昭州刺史掌皇城國信二司整肅禁衛遷大內副都知會建天章閣命領其事又勾當資善堂兼春坊司守恩長七尺狀貌甚偉洩事幹敏以彊果稱五年卒年四十八贈淄州防禦使錄其子官

劉美通子初事眞宗於藩邸以謹力被親信卽位補三班奉職再遷右侍禁咸平中傳潛流房州擇美監軍潛徙穎又爲陳穎巡檢嘗遣美廉陳州石保吉美曰保吉營繕過度

拙於檢下誠或有之自餘保無他患上意乃解充閣門祇候大中祥符二年護屯兵漢州歷遷供奉官徙嘉州撫循士卒有恩改內殿崇班提點在京倉場東西八作司以舉職聞遷洛苑副使八年預修大內以勞改南作坊使同勾當皇城司天禧初遷洛苑使領勤州刺史與周懷政聯職未嘗阿附親從卒偵邏按籍分番均使焉三年授龍神衛四廂都指揮使領昭州防禦使改侍衛馬軍都虞候五年加武勝軍節度觀察留後卒年六十廢朝三日贈太尉昭德軍節度錄其二子勇親遷補者數人追封妻宋氏河內郡夫人仁宗贈侍中子從德字復本美卒年十四自殿直遷供備庫副使後以崇儀使眞拜恩州刺史改和州又遷蔡州團練使出知衛州薦縣吏李熙輔於朝后喜曰兒能

薦士知所以爲政矣卽日擢京官從事鄭驥亦擢美官改恩州兵馬都總管知相州從德妻王蒙正女蒙正至郎官爲郡守旣而從德卒年二十四贈保寧軍節度使封榮國公謚康懷錄內外姻戚門人及僮隸數十人從德娣塔龍圖閣直學士馬季良母越國夫人錢氏兄唯演子集賢校理曖及蒙正皆遷二官戴融嘗佐從德衛州以爲三司度支判官御史曹修古楊偕郭勸推直官段少連論之胥坐貶

李延渥晉卿子蔭補供奉官尋爲閣門祇候三遷西京左藏庫使咸平初歷知平戎寧邊順安軍保州威虜軍鈐轄又知冀州六年徙瀛州景德元年十月遼師抵城下四面夾攻延渥率州兵強壯又集巡檢史普所部乘城發礮石巨

木擊之皆纍纍而墜殺傷甚衆翼日遼主與其母親鼓衆急擊延渥分兵拒守益堅遼人遁去死者三萬餘傷倍之獲鎧甲兵矢竿牌數百萬賜錦袍金帶將士緡錢遷本州團練使初戍棚垂板護城纔數寸許遼師射之矢集其上凡二百餘及請葺城詔取板視之上亟稱其勞二年徙知邢州歷天雄軍貝州副都部署知冀貝博三州大中祥符八年以疾換右領軍衛大將軍領濱州團練使明年以左武衛大將軍致仕天禧初卒子宗禹內殿崇班

王貽永字季長溥孫性清慎寡言不好聲伎生十餘歲時舅魏咸信見而奇之曰後當類我咸平中尚鄭國公主授右衛將軍駙馬都尉從封泰山領高州刺史再遷右監門衛大將軍獎州團練使求外補得知單州眞宗曰和衆靜治

所當先也真拜洛州團練使徙徐州河決徐大水作隄城南以禦之改衛州進懷州防禦使知澶定二州徙成德軍遷耀州觀察使復知澶州歷彰化武定軍節度使觀察留後拜安德軍節度使出知天雄軍徙節保寧知鄆州州介梁山多水患貽永相度地勢爲築東西道三十餘里民便之復徙定州又徙成德擢同知樞密院事改副使加宣徽南院使進樞密院使久之拜同中書門下平章事加兼侍中徙節鎮海以疾求罷遣上醫診視上臨問頒尚方珍藥手取糜粥飲之貽永願罷樞筦解使相上冀其愈聽罷侍中徙節彰德同平章事樞密使如故疾稍間入見命其子道卿掖登垂拱殿賜五日一朝遇朝叅許休殿側至和初復以疾辭拜尚書右僕射檢校太師兼侍中景靈宮使卒

贈太師中書令謚康靖貽永能遠權勢在樞密十五年迄無過失人稱其謙靜道卿西上閣門使

狄棐字輔之陽曲人唐相仁傑十四代孫徙長沙少以文謁路振振器愛之妻以女第進士以大理評事知分宜縣歷開封府司錄知璧州爲寇準所厚薦通判益州擢開封府判官歷京西益州路轉運江淮制置發運使累遷太常少卿知廣州加直昭文館代還不以南海物自隨人稱其廉拜右諫議大夫龍圖閣直學士權判吏部流內銓出知滑州進給事中徙天雄軍坐公事降知隨州徙同州勾當三班院進樞密直學士歷知陝鄭州河中河南府復判流內銓出知揚州未行卒棐在河中中貴人言將援棐棐答以他語泣政愷悌不爲表襮卒之日家無餘貲

山西通志 卷一百六
王信字公亮太原人家故饒財少勇悍大中祥符中盜起晉絳澤潞數州信應募籍軍與其徒生擒賊七十人以功補龍神衛指揮使部使者薦召閱武藝遷御前忠佐軍領河中府同華鄜延丹坊州慶成軍管界捉賊又遷龍衛都虞候兼鄜延巡檢劉平石元孫戰歿信以所部兵薄賊斬數十級遷捧日都虞候改西京作坊使知鎮戎軍徙保安軍兼鄜延路兵馬都監始至敵衆數萬夜薄城軍吏氣懾信領勁兵三千出南門與戰失其前鋒因按兵不動遲明潛上東山整軍乘勢而下擊走之多獲首級馬牛遷鈐轄兼經略安撫招討都監領貴州刺史葛懷敏敗信出兵拒敵俘斬甚衆進保州刺史就遷馬步軍都總管遂爲招討副使累遷馬步軍都虞候象州防禦使徙高陽關路王則變

明鎬奏爲貝州城下都總管城破則遁執之拜感德軍節度觀察留後召爲步軍副都指揮使卒贈武密軍節度兼侍中

王凱字勝之從祖審鈞僑京兆饒于財散施結客日馳獵南山下尹寇準見而奇之言全斌取蜀有勞審鈞又死忠義當錄其孤遂爲三班奉職監鳳翔整屋稅歷左右班殿直監益州市買院轉慶州合水鎮兵馬監押監在京草場又自右侍禁雄州兵馬監押擢閤門祇候定邢趙都巡檢使徙麟州都監嘗出雙烽橋染枝谷遇夏人破之又破龐青黃羅部再戰于伺候烽前後斬三百餘級獲馬牛橐駝器械以數千計夏人圍麟州乘城拒鬪晝夜三十一日始解去遷西頭供奉官代還爲內殿崇班麟州路緣邊都巡檢

使護糧道于青眉浪寇猝大至與同巡檢張岳相失乃分兵出其後夾擊之復與岳合斬首百餘級又入兔毛川遇賊三萬凱兵祇六千陷圍中流矢中面鬪不解斬首并自蹂踐死者以千數內侍宋永誠哭于軍劾罷之遷南作坊副使改并代州鈐轄管勾麟府軍馬事夏人二萬寇青塞堡凱出鞋邪谷轉戰四十里至杜肱川大敗之得所掠馬牛以還經略明鎬上其功領資州刺史會平甘陵盜拜澤州刺史知邠州澤州團練使歷環慶并代定州路副都總管神龍衛四廂捧日天武四廂都指揮使綿州防禦使累遷侍衛親軍步軍副都指揮使涇州觀察使又徙秦鳳路入辭諭以唃氏木征交易阻絕宜安靜以處之至則與主帥撫以恩信遂復常貢召拜武勝軍節度觀察留後侍衛

親軍馬軍副都指揮使卒年六十六贈彰武軍節度使諡莊恪凱篤于故舊治軍有紀律善撫士卒平居與均飲食臨陣毅然不少假故士卒畏服戰無不力前後與敵遇未嘗挫衄子緘

石普太原人唐河中節度雄之後自幽州徙祖全周鐵騎軍使父通事晉邸普十歲給事邸中以謹信見親補寄班祇候遷東頭供奉官捕獲永興賊邢橐馳賈禿指數百人遷內殿崇班帶御器械爲西川行營先鋒討平李順遷西京作坊使領欽州刺史順餘黨稱邛南王又爲西川都提舉捉賊使入奏面陳致亂由賦歛苛急農民失業宜稍蠲減之使自爲生則不討而自平許之普卽還蜀揭榜諭上意蜀人悅服賊平賜白金三千兩襲衣金帶鞍勒馬遷洛苑

使領富州團練使延州緣邊都巡檢使追殺羌乜羽王均亂爲川峽路招安巡檢使從雷有終擊破賊于天回鎮圍益州城繕車砲又爲地道攻城均平進冀州賜黃金三百兩白金三千兩特命兼帶御器械爲保州兵馬鈐轄北面行營押策先鋒戰廉良城長城口獲俘馘器甲甚衆徙定州路副都總管靈州失守徙永興軍上言臣嘗將兵輒破一錢與別將各持其半用相合爲信上乃置傳信牌又獻禦戎圖請設塹以陷敵馬并上所置戰械甚衆徙莫州總管望都敗令統軍一萬屯莫州浚靜戎順安軍營田河道徙屯順安西與魏能楊延昭田敏猗角掌御劔內侍馮仁俊與普不叶上召仁俊還又令率所部屯乾寧軍徙冀州總管澶淵之役王繼忠遣人持信箭遺普且通密表和議

成遷容州觀察使鄜延路副總管趙德明納款普言不宜授以押蕃落使名目恐總制屬羌強橫將不可制乃止兼管內蕃落使徙并代路改桂州觀察使鎮州路總管遷保平軍節度觀察留後幸汾陰還至陝駐蹕城中賜詩令扈從拜河西軍節度使知河陽徙許州築大流堰引河通漕京師上軍機條目二卷用將機宜要訣二圖上言聞响廝囉欲陰報曹瑋請以所獻陣圖付瑋可使必勝會請罷醮設歲省緡錢七千餘萬王欽若乘機搆之除名貶賀州聽挈家以行甫至授左清道率府副率稍復左千牛衛將軍遷左領軍衛大將軍仁宗遷左屯衛又降將軍歷左千牛左屯衛大將軍自蔡州起知信陽軍徙光州復貶左監門車府副率居滁州尋以左衛將軍分司西京給官第居蔡

州遷大將軍卒普性倜儻有膽略凡預計伐聞敵卽馳赴西平蜀盜大小數十戰衆推其勇通兵書陰陽六甲星曆推步之術太宗嘗謂普剛鷲少合然藉其善戰每厚遇之後值忌日必盡室詣佛寺齋薦以爲常

夏守恩字君殊并州榆次人父遇武騎軍校與契丹戰歿補守恩下班殿侍給事襄王宮遷西頭供奉官眞宗初四遷至北作坊使普州刺史從幸澶淵數見任使遷博州刺史歷龍神衛捧日天武四廂都指揮使泰州防禦使章獻預政以守恩領親兵倚用之擢殿前都虞候天聖初以安遠軍留後管勾殿前馬步軍都指揮使加步軍副都指揮使威塞軍節度使爲永定陵總管雷允恭誅徙節河陽三城歸鎮知澶相曹三州并代路馬步軍都總管歷天雄泰寧

武寧三節度使爲眞定府定州路都總管通判李參發其贓編管連州卒

夏守贊字子美守恩弟幼召入襄王宮稍長習通文字眞宗初授右侍禁命往綏夏伺察李繼遷遷西頭供奉官寄班祇候幸大名爲駕前走馬承受時康保裔戰沒部曲畏誅言保裔降賊守贊受密詔變服往廉得其情還奏詔恤其家移承受眞定路幸澶淵汾陰皆爲駕前巡檢遷綾錦副使幸亳州修行宮轉崇儀使提舉倉草場甚見親信遷西上閣門使提舉諸司庫務以右千牛衛大將軍昭州刺史爲樞密都承旨兼領三班院每遼使至與楊崇勳迭爲館伴凡十餘年擢侍衛親軍殿前步軍都虞候改馬軍并代州都總管累遷步軍馬軍殿前副都指揮使建武鎮東保

大軍節度使除殿前都指揮使徙節定國又徙鎮海罷管軍踰年徙定州路都總管寶元二年召知樞密院事上問西事守贊言宜併小障兵以據衝要伺便邀擊功或可成上然之辨劉平石元孫之枉自請將兵擊賊換宣徽南院使陝西馬步軍都總管兼經略安撫緣邊招討使命以御劔隨之尋詔駐軍河中居數月徙屯鄜州康定元年召同知樞密院事以子隨卒請罷以宣徽南院使天平軍節度連判澶相二州復為真定府定州等路都總管徙高陽關判瀛州卒贈太尉諡忠僖

郭承祐字天錫從義曾孫娶舒王元偁女授西頭供奉官補左清道率府率春坊左謁者真宗為玉石小牌二勒銘以戒飭之仁宗初遷西染院副使兼閣道通事舍人勾當翰

林司遷西上閣門副使坐事編管徙許州別駕起率府率遷西京作坊使勾當右驥驥院進六宅使象州團練使承祐多言事指切人過失同列謂之武諫官真授衛州刺史知相州入為羣牧副史改濰州團練使歷知曹鄭澶鄆貝州徒澶州兵馬總管役卒有異謀廉得不待奏捕斬之再知澶州入為龍神衛四廂都指揮父喪起真定府定州等路副都總管諫官歐陽修余靖論之改知相州尋徙大名府副都總管樞密使杜衍奏罷軍權為相州觀察使永興軍副都總管改知邢州徙河陽兵馬總管衍去復為殿前都虞侯并代州副都總管兼知代州徙邢州諫官錢明逸論之改相州徙秦鳳路副總管累遷建武軍節度使殿前副都指揮使尋以宣徽南院使判應天府府壁壘不完盜

山西通志 卷一百六
至卒無以禦承祐始城南關浚沙灘盟三河徙亳州諫官
論之罷宣徽許州都總管徙節保靜軍知徐州轉運使蘇
舜元薦之改知鄭州卒贈太尉謚密

閻守恭并州榆次人父榮倜儻有志略劉繼元欲召至帳下
辭不就守恭體貌奇偉劉氏平徙太原民於大名府因僑
家焉往來負販并汾間過西山聞郭進爲都巡檢使慨然
曰進不遇主亦行伍爾吾豈不及進邪遂應募隸拱聖軍
擢殿前押班咸平中從幸河北以功爲捧日副指揮使歷
拱聖龍衛捧日指揮使累遷左第二軍乾州刺史明道中
以德州刺史爲永興軍兵馬鈐轄徙并代路守恭性沉勇
御軍嚴雖家居如對賓客常訪求士大夫取郭進事師法
之俸祿悉散予人在并州因春社會客曰守恭太原一貧

民爾徒步位刺史老復官鄉里踰分多矣今日與卿輩訣
後十日卒

劉從廣字景元美次子始生補西頭供奉官遷內殿崇班侍
仁宗左右後眞拜崇州團練使娶荆王元儼女爲滁州防
禦使時年十七自言夏釁起不能扞疆場坐耗縣官願上
所給公使錢上嘉納之爲羣牧都監改副使特拜宣州觀
察使同勾當三班院請補外知洛州漳水溢穿隨故渠以
殺水勢洛人便之徙邢州籍鄉軍罷老者聽引子弟自代
著爲令召領三班院出知襄州徙正定府路馬步軍副都
總管卒贈昭慶軍節度使謚良惠從廣性謹飭喜交士大
夫當時稱之

劉永年字君錫從德子生四歲授內殿崇班仁宗使賦小山

詩有一柱擎天語上誤投金杯瑤津亭下戲曰能取之乎
永年一躍持出上拊其首曰奇童子也常置內中年十二
始聽出外累遷廉州團練使爲陝州都監郭邈山等爲盜
密遣壯士夜渡河殺其渠二十餘人衆遂散遷鈐轄擢幹
辦皇城司改單州團練使永興軍路總管副張昇使遼遼
人夜取巨石塞驛門手擲棄之遼人驚以爲神出知涇州
賜詩寵之郡兵歲以香藥爲折支三司不時輦致振武卒
突入通判聽事請以他物代給語不遜召至庭下數其罪
斬二人餘不敢動同提舉在京諸司庫務知代州遼取西
山木焚之一夕盡上稱善遼移檄捕縱火盜永年曰盜固
有罪然發在我境何須汝事乃不敢復言上嘗問禦戎策
對合旨書忠孝字以賜英宗遷沂州防禦使復知代州歷

步軍馬軍殿前都虞候太原定州路副都總管征安南請
先士卒渡富良江不許遷扈州觀察使步軍副都指揮使
卒贈崇信軍節度使諡曰莊恪

牛拱辰文水人天聖進士歷倅苛嵐定襄遷駕部員外賜三
品服進虞部郎中知房陵所至去苛細而寬約束清心潔
已未嘗爲子孫業

潘夙太原人天聖中上書論時政授仁壽簿歷知韶滑桂州
累遷河北轉運使知河中府章惇察訪荆湖討蠻獠夙陳
憂邊狀知潭州再遷光祿卿知鄂州

丁僖嵐縣人天聖朝進士任樞密使文武兼全恩威并著弊
革而獄平化行而民安

高若訥字敏之并州榆次人僑衛州進士及第補彰德軍節

度推官改秘書省著作佐郎再遷太常博士知商河縣縣
有職分田牛種皆假於民獨廢不耕御史知雜楊偕薦爲
監察御史裏行遷尚書主客員外郎殿中侍御史裏行改
左司諫同管勾國子監遷起居舍人知諫院范仲淹奪職
歐陽修移書責之未幾加直史館以刑部員外郎兼侍御
史知雜事王蒙正知蔡州若訥言蒙正起裨販因緣戚里
得官向徙柳州物論猶不平今予之大州可乎詔寢其命
大慶殿設祈福道場言大慶殿非禮不御非法服不坐國
之路寢也豈可聚老釋爲瀆慢閣文應爲入內都知言其
肆橫不法請出之遂出文應又言二府對纜數刻何以盡
萬幾宜賜坐從容如唐延英故事擢大章閣待制知永興
軍留判吏部流內銓出爲河東路都轉運使召還兼侍讀

權判尚書刑部母服除加龍圖閣直學士史館修撰以右
諫議大夫權御史中丞時宰相賈昌朝與叅知政事吳育
數爭事明年旱言陰陽不和責在宰相洪範大臣不肅則
雨不時若昌朝及育皆罷若訥代育爲樞密副使王則據
貝州或議招降言河朔重兵所積今釋不討後且啓亂階
及破城議貸知州張得一言守城不死自當誅况爲賊屈
得一遂棄市以工部侍郎叅知政事爲樞密使凡內降恩
多覆奏不行入內都知王守忠欲得節度使固執以爲不
可坐前騶毆斃路人皇祐五年罷觀文殿學士兼翰林侍
讀學士尚書左丞同羣牧制置使判尚書都省卒贈右僕
射謚文莊若訥彊學善記自秦漢以來諸傳記無不該通
尤喜申韓管子書明曆學通醫書雖國醫皆屈服張仲景

傷寒論訣孫思邈方書及外臺秘要久不傳悉考校訛謬
行之名醫多出衛州皆本高氏學皇祐中以漢貨泉度一
寸依隋書定尺十五種上之并損益祠祭服器悉施用有
集二十卷

范雍字伯純世家太原曾祖仁恕蜀宰相祖從龜刑部侍郎
入朝改右屯衛將軍僑河南雍中進士第爲洛陽主簿累
官殿中丞知端州遷太常博士寇準辟河南通判還判三
司開拆司河決滑州選京東轉運副使歷河北陝西轉運
使入爲三司戶部副使又徙度支以尚書工部郎中爲龍
圖閣待制陝西都轉運使還提舉諸司庫務勾當三班院
爲環原州安撫使建言屬羌罰羊舊輸錢而比年責使出
羊羌人頗患之請輸錢如舊罪輕者以漢法贖金從之遷

右諫議大夫權三司使論平滑州水患勞加龍圖閣直學
士明年拜樞密副使母憂起遷給事中玉清昭應宮災雍
抗言小殿僅存不若悉燔之如因其所存又將繕葺之則
民不堪命非所以畏天戒也遂詔勿葺遷尚書禮部侍郎
罷爲戶部侍郎知陝州改永興軍歲饑加賑恤請知河陽
進吏部徙應天府又改河南進資政殿學士陳安邊六事
請天雄軍聚甲兵以備河北永興軍河中府益募土兵以
備陝西卽涇原環慶有警河中援之旣而元昊拒命拜振
武軍節度使知延州請益師不報元昊先遣人通款雍信
之一日破金明砦乘勝至城下劉平石元孫夜戰三川口
大敗雍閉門堅守左遷戶部侍郎知安州居一歲復吏部
知河中府又復資政殿學士知永興軍兼轉運司事遷尚

書左丞加大學士初完永興城詔止其役雍匿詔而趨成之明年賊犯定川永興獨不憂寇復徙河南遷禮部尚書卒贈太子太師諡忠獻雍爲治尚恕喜薦士後多至公卿狄青爲小校時坐法當斬雍貸之子宗傑兵部員外郎直史館歷陝西轉運使卒子子奇

楊文廣字仲容延昭子以班行討張海有功授殿直范仲淹宣撫陝西與語奇之置麾下從狄青南征知德順軍爲廣西鈐轄知宜邕二州累遷左藏庫使帶御器械治平中上以文廣名將後且有功擢成州團練使龍神衛四廂都指揮使遷興州防禦使秦鳳副都總管韓琦使築築城文廣聲言城噴珠率衆急趨筆策比暮至其所部分已定遲明敵騎大至知不可犯而去遺書曰當白國主以數萬精

騎逐汝文廣襲之斬獲甚衆或問其故答曰此必爭之地彼若知而據之則未可圖也詔褒諭賜襲衣帶馬知涇州鎮戎軍爲定州路副都總管遷步軍都虞候遼爭代州地界文廣獻陣圖并取幽燕策未報而卒贈同州觀察使盧政太原文水人爲神衛都軍頭從劉平戰延州寇薄西南隅兵不得成列政引數騎挑戰發伏弩二百射却之日暮政說平曰今處山間又逼汙澤宜速退保後山須明決鬪不然彼夜出乘高蹙我何以禦之平不聽遂敗政脫身歸及黃德和誣平政言平被執非降也因自陳失主將當死上義其言赦之以爲供奉官德州兵馬監押預討貝州率勇敢數百飛纒絳堞而登守者莫能亢大軍乘以入遷內殿承制征儂智高有功歷秦鳳高陽關都鈐轄累遷捧日

天武四廂都指揮使三衛都虞候副都指揮使涇原定并代四路副都總管累轉邠州團練昌州防禦黔州觀察使拜武泰軍節度使時年七十三氣貌不衰侍立殿下雖久無惰容能上馬踴躍觀者壯之卒贈開府儀同三司

武英字漢傑太原人父密侍禁鎮定同巡檢戰歿望都贈西京左坊使錄英三班借職以右班殿直爲忻代州同巡檢州將出獵敵乘間引百餘騎來寇英領衆左右馳射悉擒獲之以功轉左班殿直監雄州權場改右侍禁閤門祇候爲環州都巡檢使徙洪德砦主又徙慶州柔遠砦元昊寇延州英主兵攻後橋以分敵勢擢內殿承制環慶路駐泊都監破黨平族又從任福破白豹城遷禮賓副使尋兼涇原行營都監與福合戰張家堡諸將皆趨利英度前必有

伏衆不聽伏果發福敗英猶力戰自辰至申矢盡傷重遂遇害贈邢州觀察使錄子永符東頭供奉官永孚西頭供奉官永昌左侍禁姪永保左班殿直永錫三班奉職

夏隨字君正守贇子慎重少過頗好儒多與士大夫游初蔭殿侍爲率府副率仁宗初除內殿承制歷閤門使出爲天雄軍兵馬鈐轄出知衛州徙邠州累遷泰州防禦使爲鄜延路副都總管徙環慶復還鄜延獲元昊僞書錦袍銀帶以遺金明李士彬隨力辨其行間士彬感激擊賊自效轉耀州觀察使知亳州劉平敗徙知河中以父爲經略留領會靈觀事守贇還復爲陝西副都總管兼緣邊招討副使卒贈昭信軍節度使諡莊恪

安俊字智用太原人祖贇高州團練使仁宗開資善堂俊以

將家子謹厚選爲祇候卽位補右班殿直累遷東頭供奉
官閣門祇候爲環州都監破元昊吃吼井那諸砦韓琦上
其功遷內殿崇班環慶路都監徙涇原與狄青范恪同召
使備北邊擢內園副使改禮賓使會葛懷敏敗命爲秦鳳
路鈐轄復徙涇原條上禦戎十三事再改原麟州遷六宅
使貴州刺史再知忻代州帥臣誣奏降京東路鈐轄知青
州富弼爲辨理眞除虢州刺史徙高陽關路又遷原州刺
史知滄涇冀三州秦州築古渭城徙秦鳳路總管歷龍神
衛捧日天武四廂都指揮使果州團練使環慶路副總管
遷侍衛步軍都虞候陵州防禦使卒贈閬州觀察使俊在
邊久故羌人識之种世衡嘗問降俘若屬於吾將誰畏曰
畏安太保指俊於坐曰此長髯將軍是也

楊察字隱甫其先晉人從唐僖宗入蜀僑成都祖鈞從孟昶
歸朝父居簡眞宗時都官員外郎宦廬州又僑合肥察幼
孤七歲始能言母知書自教之景祐元年舉進士甲科除
將作監丞通判宿州遷著作郎直集賢院出知潁壽二州
入爲開封推官判三司鹽鐵度支勾院修起居注歷江南
東路轉運兼按察使行部數擿奸隱衆皆畏伏尤以舉官
爲急務不效俗吏掎拾羨餘召爲右正言知制誥權判禮
部貢院時請罷糊名考士及變文格察奏防禁一潰則奔
競復起且文無今昔惟以體要爲宗若肆其澶漫亦非唐
氏科選之法議遂寢避妻父晏殊嫌換龍圖閣待制母服
除復知制誥拜翰林學士權知開封府遷右諫議大夫權
御史中丞論事無所避言舉御史格太密恐英偉之士或

有所遺又言御史故事許風聞縱所言不當繫朝廷采擇近何郟以疑似遽令中書詰問臣恐臺諫官畏罪緘默非所以廣言路也又數以言事忤宰相陳執中尋坐失出罷知信州復以侍讀學士徙揚州兼龍圖閣學士知永興軍加端明殿學士知益州遷禮部侍郎權知開封府復兼翰林學士權三司使內侍楊永德毀察於帝三司有獄辭連衛士詔移開封鞫之察乞罷遷戶部侍郎兼三學士提舉集禧觀進承旨踰年復充三司使察遇事明決勤於吏職雖多益喜不厭癰發猶入對商畫財利歸而大頓人以為用神太竭卒贈禮部尚書諡宣懿察美風儀敏於屬文為制誥皆雅緻有體當世稱之有文集二十卷兄子庶嗣

楊旼字樂道太原人保靜軍節度使重勛之曾孫第進士授

秘書省校書郎并州錄事參軍再遷大理寺丞知岳州慶曆三年湖南徭唐和劫掠州縣擢殿中丞提點本路州獄專治盜賊事戰孤漿峒前軍旼踣巖下卒厲衆平六峒以功遷太常博士尋坐部將胡元歿降知太平州歲餘賊益肆御史按視還言殄賊非旼不可乃授東染院使荆湖南路兵馬鈐轄賊聞旼至皆走嶺南又詔往韶連等州招安之乃約賊使出峒授田為民而轉運使欲授以官與貲旼曰賊飽貲糧據峒穴其勢不久必復亂明年春賊果復出陽山旼即領衆出嶺外涉夏秋凡十五戰賊平願還舊官改尚書屯田員外郎直史館知隨州召還為三司戶部判官奉使河東父艱會儂智高陷邕州召至賜服飾御巾入對便殿即日除起居舍人知諫院廣南東西路體量安

撫經制賊盜畋至韶州賊勢愈熾坐落知諫院知鄂州再降屯田員外郎知光化軍明年又降太常博士徙邠州復起居舍人爲河東轉運使入爲三司戶部副使遷吏部員外郎使遼以曾伯祖業嘗陷虜辭不行河北舊以土絹給軍裝三司使張方平易以他州絹畋奏聞又密陳其不可久之擢天章閣待制兼侍讀判吏部流內銓上言願擇宗室使侍膳嘉祐三年冬河北地震明年日食正旦復疏宜早立皇嗣以答天意改知制誥李珣自防禦使遷觀察劉永年自團練使遷防禦畋當草制封還詞頭因言祖宗故事郭進戍西山董遵誨姚內斌守環慶與強寇對壘各十餘年未嘗轉官移鎮重名器也今珣等無尺寸功特以外戚故除之恐非祖宗意不報進龍圖閣直學士復知諫院

嘉祐六年大水畋上言洪範五行傳簡宗廟則水不潤下又曰聽之不聰厥罰常水臣愚以爲萬機之聽必有失於審者七廟之享必有失於順者惟積思而矯正之乃下其章禮官并兩制考議遂詔南郊以太祖定配改溫成廟爲祠殿卒贈右諫議大夫畋出將家折節喜學問討蠻時家問至卽焚之與士卒同甘苦性清介謹畏每奏事必發封數四而後上自奉甚約及卒家無餘貲特賜黃金二百兩復賜講讀官御飛白書扇遣使特賜置其柩

趙密字微叔太原清源人政和四年用材武試崇政殿授河北隊將戍燕高宗開府檄統先鋒援汴建炎元年從張俊討任城寇李昱俊遇伏密奔射斃數人乃脫擢閣門祇候統靖勝軍平賊董青趙萬徐明等累功轉武節郎左軍統

領金陷揚州士民渡江衆數萬密露立水濱麾舟濟之破苗傅赤心軍於臨平金入明州殊死戰敗之進武功大夫陞統制紹興元年大破李成馬進皆北遁賜金帶轉親衛大夫康州刺史總管涇原馬步軍平張莽蕩尋入衛十年金侵亳宿從俊營合肥出西路時水潦暴漲涉六晝夜始達宿與敵遇敗之明年敵犯滁濠密進擊之且命張守忠以五百騎出全椒縣伏篁竹間敵疑宵遁密乃引兵出六丈河斷其歸路又敗之進中衛協忠大夫和州團練防禦使尋拜宣州觀察使爲龍神衛四廂都指揮使主管侍衛步軍海寇朱明暴橫密授張守忠方略曰海與陸異窮之則日月相持非策之善要在拊定之耳守忠用其計明降進定江軍承宣使崇信軍節度使轉太尉拜開府儀同三

司明年領殿前都指揮使獻酒坊六十六所錢十萬緡銀五萬兩助軍詔獎之告老以萬壽觀使奉朝請隆興二年進少保致仕俄再爲殿前都指揮使敵聲言航海密不爲動迄如所料和議成罷爲醴泉觀使乾道元年九月致仕卒年七十一贈少傅

金

郭文振字拯之太原人承安二年進士累官遼州刺史充宣差從宜都提控治遼深得衆心興定三年遙授中都副留守權元帥左都監行河東北路元帥府事招降太原東山二百餘村遷老幼於山寨得壯士七十分駐營柵防護秋獲奏若秋高無兵直取太原河東可復優詔許之十月權右都監與張開合堅臺州兵復取太原四年請升樂平縣

山西通志 卷一百六
爲臯州壽陽縣西張寨爲晉州從之上疏曰楊子雲有言
御得其道則天下狙詐咸作使御失其道則天下狙詐咸
作敵有天下者審所御而已河朔自用兵之後郡邑蕭然
並無官長武夫悍卒因緣而起以爲得志僭越名位瓜分
角競以相侵攘雖有內除之官亦不得領其職所爲不法
可勝言哉乞行帥府擅請便宜妄自誇張以尊大其權包
藏之心蓋可知也朝廷因而撫之假權傳授至與各路帥
府力侔勢均不相統屬陝西行省總爲節制相去遼遠道
路梗塞卒難聞知故飛揚跋扈無所畏憚鄰道相望莫敢
誰何自平陽城破以來河朔不置行省朝廷信臣不復往
來布揚聲教但令曳刺行報而已所司勞以酒食悅以貨
財借其聲譽共欺朝廷姦倖旣行遂至驕恣變故之生何

所不有此臣所以夙夜痛心而爲之憂懼也乞分遣公廉
之官徧詣訪察庶知所在利害之實伏見澤潞等處芻糧
猶廣人民猶衆地多險阻乞選重臣復置行省皆聽節制
上下相維可臂指使之則國勢日重奸惡不萌矣時澤潞
已詔張開規畫不能盡用其言二月封晉陽公河東北路
皆隸焉奏調協孟州提控伯德安事遣近臣慰諭又奏武
仙所統境土甚大雖與林州元帥府共招撫之乞更選本
土州縣官重其職任同與安集可使還定宣宗用其策又
薦葭州刺史古里甲蒲察行嵐管隩石寧化保德諸州元
帥府事從之元光元年林州行元帥府惟良得罪召還奏
惟良在林州五年政尚寬厚大得民心今茲被召軍民遮
路泣留其去未幾義尖之衆作亂逐招撫使康塘乞遣還

林州爲便不許文振上書乞遣前平章政事胥鼎行省河北諸公府帥府並聽節制詔諭百姓使知不忘遺黎之意然後以河南陝西精銳并力恢復不報復奏河朔百姓引領南望臣再四請於樞府但以會合府兵爲言公府雖號分封力實單弱且不相統攝所在被兵朝廷不卽遣兵復河北人心將以爲舉河朔而棄之甚非計也大抵欲起胥鼎爲行省定河北朝廷不能用二年詔應援史詠復河東是歲遼州不能守徙其軍於孟州以部將郝安等爲副護汾山諸寨累辭公府不許頃之部將汾州招撫使王遇與孟州防禦使納蘭謀古魯不相能復徙衛州自此不可以爲軍迄正大間寓於衛而已

趙益太原人讀書肄業元兵入鳩合土豪保聚山峽屢戰有功晉陽公郭文振署壽陽令駐兵榆次重原寨遂率衆收復太原夜登城斬馘甚衆獲老幼二萬餘口馬仗不可計陞太原治中復擢同知府事兼招撫使元光元年八月元兵攻城益急知不可支乃焚府庫殺妻子沉符印于井遂自殺贈銀青榮祿大夫河東北路宣撫使仍求其子孫段德祥陽曲人慈祥樂易遇事果敢金主聞其賢召至奇其狀貌授定襄縣主簿兼本縣尉

劉海興州人舉進士第一人仕至河南府尹死于國難子孫遂家河南焉

元

郝拔都太原人善騎射通譯語太祖遣使宋往返數四以辨稱從侵宋以功拜宣德等五路萬戶後還治太原凡遠道

租稅過重者悉除之卒追封冀國公子天益天舉天澤皆至總管

張德輝字耀卿冀寧交城人少力學數舉於鄉及北渡史天澤辟經歷官從南征時軍士逃者必戮德輝言太過止配令穴城光州下葦山民結寨德輝曰鄉民爲自保計當曉以禍福果相繼來降世祖在潛邸召見問曰孔子歿已久今其性安在對曰聖人與天地終始無往不在殿下能行聖人之道性卽在是矣又問或云遼以釋廢金以儒亡有諸對曰遼事臣未敢知金季乃所親睹宰執皆武弁世爵間用一二儒臣及論軍國大計又不使預聞大抵以儒進者三十之一然則金之淪亡自有任其咎者儒何與焉又問祖宗法度德輝指銀槃喻曰當求謹厚者司掌乃永爲

寶用又問農家對曰農桑天下之本衣食所從出今男耕女織終歲勤苦而親民之吏復橫歛以盡之則民鮮有不東餒者矣問孔子廟食禮對曰尊崇與否於聖人無所損益特以見時君崇儒重道之意耳又問典兵宰民對曰莫如更遣宗室之賢如口温不花者使掌兵權勲舊如忽都虎者使主民政則天下均受賜矣及將還又陳先務七事曰敦孝友擇人才察下情貴兼聽親君子信賞罰節用度切直多所開悟尋與元裕北覲請世祖爲儒教大宗師世祖悅受之因啟累朝有旨蠲儒戶兵賦卽令行之仍命提調正定學校世祖初命宣撫河東擊豪強黜賊吏均賦役耆耄不遠千里來謁曰六十年不復見此太平官府矣河東徭役官吏率賦一征十乃閱實戶編均其等第出納有

法汾晉地廣官世守吏結爲朋黨得姦賊尤甚者數十人械庭下數其罪惡杖出之所部肅然考績爲十路最陞見命疏所急務條四事曰嚴保舉以取人財給俸祿以養廉吏易世官而遷都邑正刑罰而勿屢赦帝嘉納焉遷東平路宣慰使奏免遠輸豆粟二十萬斛和糶粟十萬斛同知寶合丁議官賦璽絲令民稅而後輸德輝曰是誣上以毒下也且輸納后期之責孰任之遂罷其事宣慰使八刺議誅盜賊德輝曰吾豈敢曲法從汝妄殺乎至元三年召參議中書省事或言沿邊將校冒代軍士將遣使按治德輝奏曰若悉繩以法則人不自安今但易其部署選武毅有才略者任之則軍政自新委風憲官體究則宿弊自革五年擢侍御史辭請老命舉任風憲者疏烏古倫眞張邦彥

徒單公履張家張肅李槃張昉曹椿年西方賓周止高逸民王博文劉郁孫汝楫王惲胡祇適周砥李謙魏初鄭辰凡二十人德輝剛直博學有經濟器性不喜嬉笑與元裕李冶游封龍山時人號爲龍山三老卒年八十

何榮祖字繼先太原人父瑛金貞祐間試文法入優等補吏後授明威將軍守鉅鹿尹權軍器監主事因僑廣平榮祖狀貌魁偉世業吏遂以吏累遷中書省掾擢御史臺都事始折節讀書日記數千言阿合馬置總庫于其家號曰和帝監察御史范方等斥其非阿合馬知榮祖主之奏爲左右司都事以隸已未幾御史臺除治書侍御史升侍御史又出爲山東按察使而阿合馬不克逞僉事李唐卿劾帖木刺思貪墨遂擴告唐卿縱反者榮祖得其情欲抵告者

罪同鞫官議以失口亂言之罪坐之榮祖不可俄遷河南按察使卒杖其人唐卿之誣獲白平涼府言南人二十餘輩遁行省欲上聞會榮祖爲參政止之曰何必上聞去者皆人奴今遁往求其家移文召捕之可也已而俱獲治以本罪其於事明決多類此除雲南行省參知政事以母老辭拜御史中丞復出爲山東東西道按察使時宣慰使樂實姚演開膠州海道糧舶遇暴風多漂覆樂實督漕卒償之按察官莫敢言榮祖曰第上奏若見譴吾自當之卽草辭以奏詔免其徵召入爲尚書參知政事時桑哥理筭錢穀榮祖數請罷之不從屢懇請不已乃稍緩之而畿內民苦尤甚榮祖每以爲辭同僚止之榮祖執愈堅至忤旨不少屈竟不署其牘未踰月而害民之弊皆聞上乃思榮祖

言召問所宜榮祖請歲終立局考校人以爲便立爲常式詔賜鈔萬一千貫榮祖條中外百官規程欲矯時弊桑哥抑不爲通榮祖以病告特授集賢大學士尋起爲尚書右丞桑哥敗改中書右丞奏行所定至元新格請改提刑按察司爲肅政廉訪司立監治法又上言國家用度不可不足天下百姓不可不安今理財者弗顧民力之困言治者弗圖國計之大且當用之人恒多得用之人恒少省部實爲根本必擇材而用之按察司雖監臨一道其職在除蠹弊安斯民苟有弗至則省臺又當遣官體察之庶有所益上深然之屢以老疾乞解詔免署事惟預議中書而食其祿尋拜昭文館大學士預中書省事又加平章政事先是定大德律令至是詔元老大臣聚聽之歸廣平卒年七十

九贈光祿大夫大司徒柱國追封趙國公諡文憲榮祖儼
第以居飲器用青瓷杯中宮賜以上尊及金五十兩銀五
百兩鈔二萬五千貫俾置器買宅以旌其廉著大畜十集
學易記載道集觀物外篇等書子惠秘書少監

覃資榮其先懷來人父宣金末爲定羌軍刺史沒於王事資
榮與弟資用子澄山阜相繼爲交城令因占籍焉資榮官
至懷遠大將軍錫金虎符陞行元帥府事資用官至定遠
大將軍元帥左監軍

覃澄交城人資榮子襲職爲交城令有文谷水分溉交城田
文陽郭帥專其利而堰之澄折以理令決水均利於民請
免僑民逋賦能來歸者復三年公私便之歷官陝西四川
道提刑按察使兼同知宣慰使封弘農郡公諡忠宣弟山

阜代令交城終知東勝州子克修陝西漢中道提刑按察
使贈禮部尚書追封弘農郡侯諡文憲克思中山知府上
騎都尉封弘農郡侯山阜子克柔通使舍人克修子忠以
南洛尹遷保德州同知陞南康府判次質兵部侍郎次文
河南省宣慰使克思子敬漢陽知府

怯烈西域人世居太原由中書驛史從賽典赤爲雲南行省
幕官諸洞欵附嘗頒詔於緬緬王稽顙仕至資善大夫雲
南行中書省左丞大德四年卒

郝佑字君輔小字朶魯別台由宿衛補官仁宗時拜殿中侍
御史以廉直著名被知遇遷陝西行省叅知政事拜陝西
行御史臺侍御史子忠恕翰林侍制獻所著無逸圖命總
裁宋遼金三史成歸隱終身

王守誠陽曲人泰定初進士由秘書郎累官禮部尚書與修三史至正間使四川薦賢直枉爲諸道最進行省左丞卒謚文昭所著有文集

劉濬字濟川興州人金狀元海曾孫繇廉訪司書吏調連江縣寧善鄉巡檢至正十三年江西賊帥王善寇閩官軍守羅源縣與連江接壤濬妻正定史氏故相家女有才識謂濬曰事急矣可聚兵以捍一方於是盡出奩中物募壯士百餘命仲子健將之浹旬間衆至數萬賊尋破羅源分兩道攻福州濬拒之辰山三戰三捷俄福州陷衆多潰濬獨帥健兵進遇賊於中麻突其陣斬前鋒五人賊兵大至鏖戰三時頃濬中箭墮馬健下馬掖之胥被獲濬戟手大罵賊縛濬階下先斫手一指罵彌厲再斫一指亦如之指且

盡斫兩腕次及兩足濬色不少變罵聲猶不絕遂割其喉舌而死健亦以死拒賊善義之舍健使斂濬屍健歸請兵於帥以復讎弗聽健盡散家貲結死士百人詐爲工商流丐入賊中夜半發火大譟賊驚擾自相屠戮健手斬殺父者張破四并擒善及寇首陳伯祥來獻磔之贈濬福建行省檢校官授健古田縣尹官爲濬立祠福州北門外歲時致祭

馮純陽曲人舉進士爲河南行省平章後封魏國公子思溫累官彰德路總管後封晉國公思溫子本翰林檢討

馮恩陽曲人通經籍敦行誼蒞官廉明善理冤抑累官御史中丞集賢院大學士

郭周岢嵐人官義勇軍萬戶遇歲饑發廩賑貸多所全活超

授本州防禦使賜金牌充宣差提控再進鎮國上將軍鎮遠節度使兼嵐州管內觀察使河東北路關外六州都元帥懸帶虎頭金牌便宜行事卒於官

武祺太谷人以儒進歷知安慶路桐城縣事發奸摘伏果斷如神淮西廉訪司與安慶路交章舉薦歷省部臺二十餘年官至甘肅行省叅政妻王氏罵寇死節

杜克温大谷人上都巡警院使有没入男女奏許令配偶有古杜母之謠歷官銅鐵冶提舉使

武簡如太谷人性寬厚任大理評事議獄多仁恕終開州刺史

高福太谷人授龍虎衛上將軍南北二路征討元帥事

王佐字元輔晉寧人賊至爲所獲欲降之佐傲岸自如詬賊

不輟見害

賀方字伯京晉寧人以文學名爲治書侍御史明兵下集慶死之

